



INSAIT

**Bas fe long Mosbi em i 90t - P3**



**Ais i bagarapim ples long Westen Hailans - P7**



**Ol meri opim poltri projek long Sentral Bogenvil P11**



# Maiha: Atoriti na manmeri mas redi

Paul Zuvani i raitim

**GAVMAN na ol pipel i mas redi long ol bagarap we inap kamap long narapela foapela mun bikos long bikipela san i kamap, Nesanel Weda Sevis opis i tok.**

Sam Maiha, Dairekta bilong Nesanel Weda Sevis i tokim Wantok Niuspepa olsem bikos long dispela haptela san ol i kolim El Nino i kamap, nogat ren bai kam long narapela foapela mun na planti hap bai drai na no gat wara.

Em i tok bikipela bagarap long ol bus na gaden kaikai i kamap em long kol o frost we i pundaun na i no long hat bilong san.

"Ol mun namel long Septemba i go long Disemba bai drai tasol, no gat ren.

"Kaikai na wara bai sot na olsem ol atoriti na manmeri i mas was na redi long dispela ol hevi we inap long

kamap," Maiha i tok.

Askim long as bilong kol i kamap na frost i pundaun long nait Mista Maiha i tok dispela em bikos i nogat klaut i stap antap long pasim kol bilong solwara we i go antap long klaut long taim bilong san.

Na long nait taim bikos no gat wanpela samting i pasim em kol i kam daun stret na kisim ples bilong hat antap long graun.

Long dispela as em i kol moa long nait, frost i kamap na bagarapim gaden kaikai na ol busgraun.

Nau yet ol ripot i tok frost i bagarapim ol gaden kaikai long Imbongu, lalibu Pangia long Sauten Hailans, Kandep long Enga, Tambul Nebilyer long Westen Hailans na Simbu provins.

*I go moa long pes 2...*

**BAGARAP:** Taim bilong bikipela san na drai sisen long hailans rijon na long ol narapela hap bilong kantri i kamapim hevi long sot long wara na kaikai. Piksa i soim bikipela ais i pundaun long Kandep distrik na bagarapim ol gaden kaikai bilong ol ples lain, olsem ol mama ya i soim. Em bai kisim bikipela taim long laip i kam bek nomol.

*Lukim Stori long pes 6,7,8 na 14.*



**International calls for less**

Contact us now!

Customer Care 76003555

support@bmobile.com.pg

www.bmobile.com.pg





# Fiji bung bai lukluk long menesmen na divelopmen bilong tuna bisnis

...Bikpela kontribusen bilong Ol PNG sponsa

Veronica Hatutasi i raitim



John Kasu Menesing Dairekta bilong NFA.

**DIVELOPMEN**, menesmen na sastenebiliti o skruim wok lukaut long tuna pis bisnis em sampela long ol bikpela samting ol bai toktok long en long bikpela tuna konprens long Suva, Fiji, long mun i kam.

Namba 5 Pasifik Tuna Forum bai lukim samting olsem 300 pipel i kam long ol tuna bisnis, ol gavman, ol praiwet sekta, ol Non Gavman Ogenaisesen (NGO) na ol arapela i gat intres long tuna bisnis. Bai i bung long glasim na skelim ol toktok na tingting long stongim na sapotim ol wok long tuna bisnis insait long Pasifik rijon. Dispela bung bai kamap long Septemba 22 na 23 long Sofitel Hotel long Nadi.

Papua Niugini yet i bin sanapim dispela ogenaisesen, Pasifik Tuna Forum, insait long Pasifik rijon long 2006 bihain long wankain forum i save kamap long Kuala Lumpur long Malesia, wantaim luksave olsem Pasifik rijon na moa yet, Wes Pasifik na PNG em eria we i gat bikpela populesen bilong tuna long wol.

Dispela rijon i save kamapim 50 pesen o hap bilong tuna pis ol i kisim long wol.

PNG, Kiribati na Masel Ailan i go pas long en i save saplaim wol wantaim wan tet bilong tuna saplai long wol.

Long Pasifik rijon yet, PNG i save saplaim 18 pesen long tuna i go aut long wol, na Yurop em top tuna maket bilong PNG tuna.

Long wanpela bung we Nesanel Fiseris Atoriti (NFA) i bin holim long Mosbi long las wik Fraide, Menesing Dairekta, John Kasu i bin tok gavman bilong PNG aninit long NFA i bin sanapim dispela Pasifik Tuna Forum na namba wan bung i bin kamap long PNG long 2007 na long 2009.

Bihain long namba wan bung long Pot Mosbi, PNG long 2007

we i bin ran gut, ol kantri long Pasifik rijon i bin lukim olsem em i wanpela bikpela bung, na ol i wanbel long holim kain bung bihain long tupela yia.

Mista Kasu i tok INFORFISH em wanpela inta gavman ogenaisesen i save givim sevis i stap long Kuala Lumpur long Malesia na PNG NFA wantaim sapot bilong ol rijonal ogenaisesen olsem Pasifik Ailan Forum Fiseris Ejensi (FFA), Seketeriet bilong Pasifik Komyuniti (SPC) na Westen na Sentral Pasifik Fiseris Komisin (WCPFC) i save go pas long ranim dispela bikpela bung.

Mista Kasu i tok bung bai toktok na lukluk long tuna menesmen long Pasifik rijon, sans long maketim ol tuna prodak, intansenel tred na ol banis long tred eria, risets na divelopmen long ol nupela tuna prodak, ol divelopmen bilong tuna bisnis lobg bihain taim long rijon, sastenebiliti o wok bilong skruim na strongim tuna bisnis.

Mista Kasu i tok ol kain bung olsem i save kostim bikpela mani na ol i bilip olsem long manimak bilong Fiji, em bai kostim FJD800,000 we gavman bilong Fiji aninit long Fiseris na Forestri

Ministri bai baim 50 pesen o hap long en.

NFA i save skelim K1 milien long karamapim ol wok bilong holim forum olsem inapim kost long ples bilong holim bung, kaikai na ol fainsen na tu, ol travel kos o balus tiket, ples bilong slip bilong ol ges spika na ol kain wok olsem.

Long wankain taim, bung bilong las Fraide i bin lukim 40 gavman na praiwet sekta ogenaisesen long PNG i sponsa long dispela bung long Fiji wantaim mmoa long K1 milien.

Long dispela, 12-pela ogenaisesen i kamap pletinum sponsa wantaim wan wan i putim K40,000, 13 gol sponsa we wan wan i putim K20,000, 5-pela em ol silva sponsa we wan wan i putim K15,000, 4-pela i kamap brons sponsa we wan wan i putim K10,000 na 6-pela narapela we wan wan i givim K5,000.

Mista Kasu i bin givim bikpela tok tenkyu i go long ol dispela sponsa.

Long givim ol luksave long bikpela na gutpela sapot bilong ol, wan wan long ol ogenaisesen i bin kisim ol luksave presen na ol balus sit long go long dispela bung.

## Fairweather askim long daunim strong bilong Kina

Paul Zuvani i raitim

**MEMBA** bilong Sumkar Fairweather, i tok Gavman i mas daunim strong bilong Kina long pesen long lukim moa kantri i baim samting long Papua Niguini na pulim mani i kam insait.

Em i tok bikos strong bilong Kina i antap moa na i mekim Papua Niugini i painim taim long salim ol samting i go aut long ol ovasis maket.

Em i tok ol narapela kantri i painim taim long baim ol samting long PNG.

Nau yet long eksenis reit, strong bilong PNG K1 egensim \$1 bilong Amerika i stap long mak bilong 36 toea.

Mista Feaweather i askim long PNG i daunim strong bilong K1 i kam daun long 16 toea egensim \$1US.

Long wanpela wei tok bilong Mista Feaweather i gutpela tasol sampela saveman i tok dispela i no gutpela long wanem em bai mekim guvim hevi long PNG i baim ol samting long ol arapela kantri olsem Australia, Nu Silan o Amerika,

Nau yet bikpela poroman kantri em i mekim maket em Australia bihain long dispela em Saina na Japan.

Mista Fairweather i askim long daunim strong bilong Kina long taim em i amamas long pawa na televisen sevis em i kisim i go long ol manmeri na ol skul long distrik bilong em.

Em i tok gavman i mas amamas long mani em i putim i go long wan wan distrik.

Na nau ol distrik i ken lukim gutpela senis.

Dispela long wanem gavman i gat inap mani.

Long distrik bilong em planti manmeri i stap long strong bilong kakao na kopra tasol bikos long sik kakao bora

na binatang i kaikaim ol kokonas, ol manmeri i kisim taim nau.

Tasol em i tok nau yet ol manmeri i stap long strong bilong buai na daka we ol i salim long ol Hailans.

Mista Fairweather i tok taim strong bilong Kina i kam daun moa kantri bai baim samting bilong PNG na putim mani i kam insait.

Na taim moa kantri i baim samting, PNG bai kisim gut mani maski i gat hevi bilong mani we i kamap long planti hap bilong wol long dispela taim.

Em i givim piksa long kantri Filipins na Indonesia olsem tupela i kisim gut mani long dispela taim.

Em i tok PNG ikonomi i no bikpela we em i gat strong long mekim prais i go antap o i kam daun long taim em i resis long salim samting long wol maket.

Nau yet PNG gavman i stap long strong bilong wel, ges, kopa na gol na taim prais bilong ol dispela samting i go daun, em i no gat narapela hap long kisim strong.

Long dispela as Fairweather i tok gavman i mas stat long lukluk long ol arapela hap bilong mekim mani olsem egrikalsa o long menufektaring (fektori) bisnis.

Em i mas stat givim inap sapot long wok bilong groim na lukautim kakao, kopi, kokonas, welpam, ol abus olsem kau, pik, kakaruk na ol gaden kaikai na kumu.

Long dispela as gavman i mas daunim mak bilong strong o sas bilong dispela ol samting i kam daun long 50 pesen mak:

- STRONG bilong Kina.
- INTERES reit
- INKAM (Income) Takis
- PE Rol Takis
- GUDS na Sevises Takis

## Wok painim long 10-pela pipel i stop

Tony Sapan i raitim

OL i pasim pinis wanpela wok painim long 10-pela pipel husat i lus long banana bot namel long Namatanai na Samo viles long Lihir Ailan, wanpela mun na tripela de bihain long ol i lus long namba wan de bilong mun Julai.

Dispela 10-pela pipel wantaim wanpela mama na wanpela pikinini, i go lus long wokabaut em i save kisim olsem tupela aua. Nimamar LLG i yusim pinis K72 Tausen long wok painim bilong ol dispela pipel namel long ol wokman bilong gavman em tripela opisa

wantaim vais presiden bilong LLG i bin mekim i go long ol ailan bilong Atonomos Bougenvil Rijon.

Wanpela ripot long dispela wok painim ol i salim pinis i go long Disasta Opis bilong Ni Ailan Provins na Nimamar LLG.

## Wok i gohet gut long nupela klasrum

Tony Sapan i raitim

OL wok bilong sanapim wanpela nupela klasrum i gat 4-pela klasrum long en na tupela haus bilong ol tisa long Nu Hanova Haiskul insait

long Lavongai Lokal Level Gavman i wok long ran gut tasol. Wanpela kontrakta, Nu Ailan Provinsal Woks i bin givim wok en i go pas long ol dispela projek.

Gavana bilong Nu Ailan Sir Julius Chan i laikim wok long ol dispela projek long pinis bipo long independens de, na bai ol i opim long 16 Septemba 2015.

## No gat wara kamapim hevi long Palie Praimeri

Tony Sapan i raitim

TRIPLELA mun long kisim liklik wara i kam long hap skul i save kisim wara long en i mekim Palie Praimeri Skul namba tri bikpela praimer i skul long Lihir Ailan long salim ol pikinini i go skul long hap de tasol.

Tu handet na 68 sumatin stat long Kinami insait long Wod 4 i go long Talies long Wod 7 i stat go long skul long hap de tasol stat long 8 klok i go long belo i no gat moa wara long ol olgeta tenk wara long skul.

hevi long wara i sot i go het long ol taim i kam.

Palie Praimeri skul i no wanpela lain tasol long ailan i bungim hevi we longpela taim i no gat ren, long planti ples ol pipel i wokabaut longwe long painim wara bilong dring na kuk.

Ol go pas bilong skul i ting skul i ken pas sapos

## Maiha: Atoriti na manmeri mas redi

I kam long pes 1...

Long dispela wik Disasta Komiti we i gat mausman bilong Opis bilong Sif Seketeri, Nesanel Disasta Senta, Nesanel Weda Sevis, Intagavman Rilisen Dipatmen, Nesanel Egrikalsa Risets Senta na Difens Fos i bung na pasim tok long givim K5 milien olsem rilif mani i go long ol manmeri husat i bungim hevi bilong sot bilong kaikai na wara.

Maiha i tok bikos planti hap bai drai planti das bai kamap na ol sik we i pas

long das olsem kus tu bai kamap olsem ol manmeri i mas was long stap longwe long das.

Moa yet manmeri i no ken kamapim paia nating bikos bikpela ol paia inap kamap na bagarapim ol ples.

Long Pot Mosbi PNG Pawa i daunim mak bi-man i go long ol manmeri long saplai bilong wara bilong em long Sirinum Dem long Sogeri, Sentral provins long 10 kiubik mita i go daun long 6 kiubik mita.





# Bas fe long Mosbi em i 90t

...Bas no ken ran long friwe

Aja Potabe i raitim

INO K2 o K1 tasol 90t em i mani mak we gavman i makim long PMV bas fe long olgeta hap bilong Mosbi siti.

Dispela toktok i kam long Indipenden Konsuma na Kompetisen Komisn (ICCC) bihain long planti manmeri i wok long komplem long polis na ICCC olsem ol PMV bas draivana bas kru i wok long sasim bas femanilong laikbilongol yet.

Insait long Mosbi siti, ICCC i tok klia olsem trupela bas fe we gavman i oraitim long en em i 90t.

"Olgeta PMV draiva i ken sasim 90t bas fe tasol sapos ol i sasim bikpel mani, ol i brukim lo na ol bai asua long sakim dispela toklukaut i kam long ICCC," ICCC i tok long wanpela pablik notis.

Sapos wanpela pasindia i stap long Boroko na i laik go long Gerehu, dispela pasindia i mas peim 90t.

"Tasol mipela i peim K1 bas fe. Sampela taim draiva na bas kru i save sasim mipela K2 bas fe," Luther Lamang i tok.

Luther i save wok long Boroko na em i save stap long Gerehu. Tasol em i bin peim wanpela 90t bas fe.

Bos bilong polisman insait long Mosbi, Metropolitan Suptenden Andy Bawa i givim tok lukaut long ol papa bilong bas na bas draivana bas kru long stopim dispela pasin bilong sasim iligel bas fi o bas fi i no bihainim lo.

Bawa i tok tambu long ol PMV bas draiva long yusim friwe rot bikos dispela rot em i no rot bilong ol PMV bas.

"Tambu tru long yusim friwe rot. Dispela toklukaut i go long olgeta PMV bas draiva. Na tu, noken sasim bikpela mani long bas fe. 90t em i bas fe mak we gavman i makim long en," em i tok.

# Daunim prais long pulim moa turis

Aja Potabe i raitim

PRAIS bilong balus tiket, hotel rum, intanet na arapela samting em i antap tumas long PNG, na dispela em i wanpela samting we i wok long stopim moa turis long kam insait long kantri.



Dispela em i tingting bilong wanpela turis bilong Saut Korea, Ted Lim husat i save ronim wanpela liklik stua kampani bilong en yet long Bangkok, Tailan.

"Prais o mani mak bilong ol samting long hia em i antap tumas. Prais bilong balus tiket bilong Air Niugini na arapela ol balus insait long PNG em i antap tumas," Lim i tok.

Sapos gavman i daunim prais bilong ol samting olsem balus tiket na prais bilong hotel rum, moa turis bai kam insait long kantri long lukim kainkain bilas na kalsa bilong yumi.

Em i tok Tailan em i wanpela kantri long Esia we planti turis i save kam lukim ples bikos prais bilong ol samting long hap em i liklik mani.

"I no olsem PNG. Balus tiket, telepon, kar, kaikai, hotel rum na olgeta samting em i bikpela mani. Prais o mani mak bilong ol dispela kain samting long Tailan na Saut Korea em i liklik mani tasol," Lim i tok.

Lim i tok PNG i ken kisim moa mani long turis bikos kain kain kalsa na bilas bilong yumi em i wanpela kain samting we planti turis i kam long ol arapela kantri i save laikim tru long lukim.

"Kainkain bilas bilong PNG i ken pulim moa turis i kam insait long kantri, tasol prais bilong ol samting em i antap tumas."

Lim em i wanpela bekpeka turis husat i save kam planti taim long PNG na stap wantaim ol Facebook poroman bilong en.

"Mi gat planti poroman long Fesbuk. Mi save stap wantaim ol, tasol sampela ol turis i save les long stap wantaim ol arapela manmeri," em i tok.

Em i tok sapos gavman i daunim prais bilong hotel rum na balus tiket wantaim intanet na prais bilong kaikai, PNG bai lukim moa turis i kam insait long kantri.



## A SMART SOLUTION FOR SMALL BUSINESS

### Mobile & Internet Banking

Make supplier payments, transfer funds, pay workers and manage accounts anytime, anywhere.

### EFTPoS

Safer, convenient solution for you and your customers. Reduces risk of cash handling and builds financial history.

### Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

### PLUS - Smart Business Loan

By having a Smart Business Package Account, you can have access to a Smart Business Loan.

## BSP Smart Business Package

offers essential products that can help SMEs manage business funds and provides a pathway for growth.

**NOW OPEN**

BSP SME Business Centre  
Waterfront Place Shopping Mall,  
Port Moresby.



320 1212 / 7030 1212 - 24/7  
servicebsp@bsp.com.pg  
www.bsp.com.pg





### Riviu bilong dispela wik...

#### Maprik i stopim bia – Is Sepik

MAPRIK distrik long Is Sepik i stopim bia i go long 40<sup>th</sup> independens selebren long distrik.

Memba bilong Maprik John Simon i tok aut long dispela wik olsem long wanpela wik lotu bung, ol Distrik Dvelopmen Atoriti (DDA) i stopim bia.

Ol bai gat ol sios i kam long olgeta hap long Pasifik olsem Vanuatu na Solomon Ailan long dispela sios program.

#### Ol subsidi i go insait long ol skul

SEKETERI bilong Edukesen, Dokta Uke Kombra, i tok ol namba tri kwata bilong ol tuisen fi i go insait long ol benk tupela wik pinis.

Em i tok ol skul mas gat mani pinis long ol benk akaun bilong ol long go het long wok.

Dokta Kombra i tok moa olsem husat i kolim em yet tisa mas no ken givim giaman toktok long ol pablik olsem ol i no kisim mani yet.

Em i mekim dispela toktok bihain long wanpela tisa long Morobe provins i tok ol sumatin i go long haus bikos ol i no kisim tuisen fi long gavman.

#### Ol siklain gat TB klinik-Madang

OL pipel i gat strongpela kus (TB) long Usino-Bundi eria long Madang provins i ken kisim marasin long nupela TB Klinik long Modilon Jeneral Haus sik.

Praivet Australia mineral kampani Heritej Niugini i givim mani long mekim dispela klinik.

Dokta Matupi Apaio, husat i go pas long wok wantaim ol TB siklain i tok dispela projek long provins i bikpela samting bai helpim ol pipel long rurel ples long Usino-Bundi.

#### Dauli Tisa Kolis bai pas – Hela

DAULI Tisa Kolis long Tari bai pas sapos no gat pawa saplai. Dispela em prinsipal bilong skul, Dale Kinol i tok.

Em i tok kolis i no bin gat pawa olsem long 7-pela mun na ol i raitim ol pas i go long provinsal gavman na menesa dairekta bilong PNG Power long Tari tasol ol i no mekim wanpela samting.

Ol i yusim wanpela 5KVA jenreta long mekim ol opis wok na skul.

Mista Kinol i tok PNG Power em hap bilong gavman tasol em i no save wanem as bai bikpela institusen i no kisim sevis.

#### PNG FM i gat bikpela senis long NCDC na Sentral provins

OL redio stesen i go pas long Papua Niugini (PNG), YUMI FM, Nau FM na Legend FM i kisim bikpela senis wantaim tupela nupela kilowatt transmisa bilong FM bai karamapim Nesenel Kapitel Distrik (NCD) na Sentral provins.

“Dispela i min olsem mipela i dabolim pawa bilong mipela long dispela eria,” Jenerel Menesa bilong PNG FM, Adrian Au i tok.

“Long dispela as kawarij o eria bilong Sentral provins i karamapim i go bikpela wantaim ol pipel i harim redio i ring long Gabagaba Viles long Magi Haiwe. Long Hiritano Haiwe, ol i ken harim mipela long Galley Rij. Mipela i karamapim Sogeri Pletu tu.”

Pawa i go bikpela i min olsem ol ples olsem Ela Bis, we i no save harim gut redio bikos em i stap aninit long maunten, PNG FM bai go bikpela long hap na klia stret.

Dispela pawa go bikpela bai stretim hevi bilong ol pipel save harim redio long ol bikpela bilding.

“Mi bilip olsem no gat narapela FM redio stesen i save amamas long ol eria mipela i karamapim long NCD na Sentral provins, Mista Au i tok.

Kos bilong dispela projek senis em K100,000. Em i bihainim wankain level bilong invesmen pas long dispela yia taim PNG FM i opim transmisen long tripela stesen long Buka.

# Gavman mas kamap wantaim rot long stopim disasta

Esther Bralyn Wani i raitim

**DIPATMEN bilong Minerel Polisi na Geohazard Menesmen i wok bung wantaim PNG Nesenel Disasta Senta long kamap wantaim wok bilong Gavman Teknikel Infomesen long Disasta Resiliens Inisiativ.**

Dispela bung i kamap long toktok long ol stek holda long ol rot bilong banisim ol bikpela disasta o hevi. Gavman bilong Australia na PNG i wok long ol bailetrel projek we Dipatmen bilong Foren Afes na Tred

long Australia i saptim.

Dokta Kelly Strzepek, Sains Komyuniketa bilong Jiosains Australia, i luksave bihain long Kokopo Risk Infomesen Woksep olsem long mekim ol pipel i save gut long ol sain na rot bilong abrusim disasta, ol saintis i mas mekim isi long ol pipel long disisen level long save na bai ol i mekim wok kamap.

Mis Strzepek i tok sapos ol i raitim planti wok stret na givim long ol pipel long disisen level long lukim, bai ol i kisim na putim long sait. Tasol sapos ol i yusim sampela pawa poin prisentesen we i kamap olsem muvi o

piksa bai, ol i luksave long ol bikpela hevi we i ken kamap.

Long wankain taim, Rijinol Dvelopmen Seksen Lida bilong Jiosains Australia, Dokta Andrew Jones i tok em i gutpela sapos olgeta dipatmen i wok wantaim long luksave long ol disasta i kamap long PNG.

Dokta Jones i tok em i gutpela long save long amas pipel i stap long hap we bikpela birua bai bungim ol, na ol rot we i ken pas sapos hevi i bungim ol.

Em i tok i gutpela long plenim pastaim long disasta i kamap.

## POM Siti bai groa bikpela

Aja Potabe i raitim

NCD Gavana Powes Parkop i tok Mosbi Siti bai senis taim PNG Pots i muvim nupela sip bris i go long Motukea Ailan klostu long Tatana.

Parkop i bin mekim dispela toktok taim ol i opim nupela Motukea Ailan sip bris.

Em bin amamas stret long Praim Minista, Peter O’Neill na Pablik Entaprais Minista Ben Micah long givim tok orait long muvim sip bris i go long Motukea.

“Mi amamas stret long Praim Minista bilong yumi. Disisen em i mekim long muvim dispela sip bris i kam long hia (Motukea) bai nau mekim Mosbi siti groa moa na kamap olsem sampela ol narapela metropolitan siti,” Parkop i tok.

Taim PNG Pots i muvim sip bris i go long Motukea, nau ples we sip bris i stap long daun taun o Fairfax haba bai kamap sentral bisnis distrik (CBD) bilong daun taun Pot Mosbi.

“Mipela i gat plen long senisim pes bilong daun taun. Siti bai suruk kam olgeta long Haba siti long Kone. Ol bikpela



Planti dispela kain haus bai kamap long nau sip bris stap long en taim PNG Pots i muvim Mosbi sip bris i go long Motukea Ailan. Piksa: Media Hillside Ltd

stori bilding o longpela haus bai sanap long hap,” Parkop i tok.

Praim Minista Peter O’Neill i tok dispela sip bris long Motukea em i wanpela wol klas sip bris stret.

“Dispela wol klas sip bris bai nau larim moa sip long kam sua

na kisim kago i go i kam long kantri bilong yumi,” O’Neill i tok.

Em i tok Fairfax Haba em i winim klostu long 145 krismas nau gavman i gat nupela plen long senisim Fairfax long kamap siti tu.

Nesenel Risets Institut (NRI)

dairekta Dokta Charles Yala i singaut long NCD na gavman long noken larim ol man i mekim ol haus nating nating long Fairfax Haba.

NRI i laikim gavman long yusim gut dispela eria na mekim ol wol klas stori bilding na apim stendet bilong Mosbi siti.

## PM: Gavman kirapim planti nupela rot

Aja Potabe i raitim

GAVMAN i mekim planti nupela rot insait long Papua Niugini.

Dispela i no nupela samting, tasol mekim rot em i wanpela han mak bilong Pipols Nesenel Kongres (PNC) Pati bikos nau dispela bikpela Poreporena Friwe i stap long Mosbi em i han mak bilong bipo PNC pati lida na PM leit William Skate.

Praim Minista Peter O’Neill tokim Palamen i no long taim tasol olsem dispela kantri bai lukim planti nupela rot i kamap bihain long tupela o tripela yias.

Long Mosbi tasol, gavman i givim mani long larim ol konstraksen kampani i stretim planti ol liklik han rot insait long siti.

Wantok Niuspepa i lukluk

raun long siti na em i lukim olsem liklik han rot insait long daun taun i wok long senis na kamap gut tru stret.

Konstraksen kampani Global Konstraksen i nau wok long stretim 2-Mail-Badili seksen bilong Sir Hubert Murray haiwe insait long Pot Mosbi.

“Kepital siti bilong yumi i wok long groa i go moa yet. Nupela rot i stat long 9-Mail na bai kam olgeta long 8-Mail na Gerehu na pinis long Baruni na Taun,” O’Neill i tok.

Dispela rot bai banisim siti i kam insait na mekim Mosbi siti i go bikpela tru. Konstraksen wok i kamap pinis na Sainis kampani Haba Enjinierin Kampani i go pas long rot konstraksen wok.

Tasol O’Neill i no tokaut long hamas mani gavman i yusim

long peim dispela kampani long mekim dispela rot.

Las wik tasol Dipatmen ov Wokis i putim wanpela pablik notis long niuspepa olsem kolta i nau stap pinis long Mendi-Kandep rot na Laiagam-Porgera rot.

Bipo kolta i no bin stap long dispela tupela rot. Laiagam-Porgera rot em i bin karanas tasol. Nau aninit long lidasip bilong O’Neill, gavman i putim kolta long dispela rot i go pinis long Porgera gol maining stret.

“COVEC i stretim Hailens Haiwe i stap. Lae-Nazab Haiwe tu i stap long han bilong COVEC. Ol i wok long stretim i stap. Dispela em i sampela gutpela samting gavman bilong yumi i wok long mekim,” O’Neill i tok.

PM i tok wanpela nupela rot ol

i kolim Nu Briten Haiwe bai klostu taim tasol joinim Kokopo na Kimbe. Dispela em i wanpela nupela rot tu.

Em i tok long Nu Ailan, gavman i givim pinis mani long stretim Buluminski Haiwe na dispela bai lukim moa turis i kam long skelim naispela bilas ples, Nu Ailan.

“Nau long Sauten Hailans, Hela na Galp provins bai lukim nupela haiwe i joinim ol dispela tripela provins. Kontrekta i mekim gutpela wok tru na i gat sampela misin link tasol ol bai joinim bipo rot i ken op long larim pipel i kisim sevis,” O’Neill i tok.

Em i tok gavman i luksave long Sepik Haiwe na tu nupela sotkat rot i stap long Hagen na go long Madang we PNGDF



# PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

## 2015 GLOBEATHON UPS AWARENESS ON CERVICAL CANCER

With the third staging of Globeathon, the global synchronized awareness walk for below-the-belt women's cancers, about to be held at Pacific International Hospital on 27 September 2015, attention is being raised about cervical cancer.

Cervical cancer has a high incidence in Papua New Guinea. It is estimated that per year there are 3,000 new cases being diagnosed nationwide. As of July 2015, in Pacific International Hospital alone, there were 260 new cases being diagnosed, which is a figure much higher than during the same time in 2014.

Cancer of the neck of the baby's bag (cervix) is the most common cancer in PNG women. Despite it being the most controllable and treatable form of cancer, it is one of the top cancers in the country. The usual age group to get cervical cancer is between the ages of 30 and 50. Cervical cancer is caused by chronic (long time) infection with a virus called Human Papilloma virus (HPV); if the problem is found in the stage of virus infection or when there are only early (microscopic changes) in the cervix it can be easily treated.

The Human Papilloma Virus, or HPV, is fairly common, and there are about three dozen or so different strains of them. Only 2 or 3 of these HPV strains are regarded as prime causes for cervical cancer to develop. It is considered normal for a few of the HPV types to be present in our bodies at any given time.

So how do the "dangerous" forms of HPV get into our body systems? It is mainly through sexual contact. Male partners oftentimes act as the "carriers" of this HPV. They do not usually cause ill effects on males, but when a woman gets to have it, it can lead to cervical cancer.

**Risk factors for getting this cancer are:**

- Women who began sexual activity when they are very young i.e., Before age 19 years
- Women whose husbands have had many partners
- Women who have had many partners themselves

**Ways of preventing cervical cancer:**



Tura the Kokomo, the 2015 Pacific Games Mascot also present at the start of the Globeathon on Cancer last year. With Tura are, the Chairman of the PIH, Lady Linda Babao O'Neill, Cancer Ambassador and the Governor General Grand Chief Sir, Michael Ogio and wife Esmie, CEO of PNG Cancer Foundation Dadi Toka Junior and Doctors from the PIH.

Photo: Nicky Bernard

■ Girls should avoid having sexual intercourse or getting married until they are over 19 years

■ Everyone should try and have less sexual partners (both men and women)

Avoid smoking  
Use a condom during sexual intercourse, both male and female are available.

It is possible to diagnose cervical cancer at a very early stage (when it is possible to easily remove it) by doing a simple test every two years, once a woman is sexually active, called VIA (Visual Inspection of the cervix) or PAP smear test. These tests will detect any infections and abnormalities some of which are not cancerous but will need medication and a follow up test.

One case shared by Dr. Mathias Sapuri of the Pacific International Hospital is about a patient we will refer to as "Veronica" (not her real name):

Ms Veronica 36 years old referred from Wewak General Hospital with cervical cancer Stage 2A required confirmatory diagnosis and surgery for radical pelvis clearance. She had

staging confirmation with MRI IN 48 hours and biopsy histopathology confirmation in 3 days, and then proceeded on to radical hysterectomy in 6 days. She was admitted to PIH and had radical hysterectomy done and recovered very well and was discharged in 7 day. She returned home in 4 weeks and her follow up CT scan and MRI cleared any residual disease. Follow up at 2 months, 4 months and 6 months were normal. She will progress on to 6 monthly reviews and subsequently annual review when she is completely free of the disease. All her female family members and relatives were encouraged to have the Gardasil Vaccine to prevent cervical cancer.

The sad thing about combatting Cervical Cancer is that despite it being clear that early detection can indeed save lives, many do not undertake having a PAP Smear test, when it is a simple test that costs less than 200 Kina.

Dr. Sapuri noted that there is a 90% Five Year Mortality (patient passes away in 5 years or less) when the Cervical Cancer is discovered at Stage 3 or Stage 4. While when

there is early detection at Stage 1 or Stage 2 the Five-Year Mortality Rate is only 20%.

It was recently reported in one of the daily newspapers that Dr. Sapuri was raising the caution to all to be careful of claims about different untested alleged medications which are said to be "cancer cures". **There is no existing nutrient, food, supplement, tablet, capsule, or any liquid that could be taken in which would then reverse cervical cancer.**

The three treatment options are surgery, chemotherapy, radiotherapy. This is the result of someone very familiar with cancer treatment recently walking past a seminar room of a hotel in Port Moresby, and the person was offered a product being claimed to be a "cure" for cervical cancer. The person then asked "are you really saying it's a cure?" She was told it was... this person then reported the matter to Pacific International Hospital.

There was a different report wherein someone was being sold a panty shield product which was claimed to be a deterrent to cervical cancer. How any panty shield could stop an HPV virus is quite baffling to think about.

As the one who made the first report (about the "cure") noted, "it is so sad that many take these home

remedies and get misled to think they are working, then, when the symptoms get worse, they go to professionals like Dr. Sapuri very late, consulting with him by the time they are stage 3 or stage 4 cancer."

What's even sadder is that there actually is a vaccine that could prevent cervical cancer, and it has been proven to be very effective. It is called Gardasil, and it is best administered to females before they have any sexual contact. In other countries, it is administered to females usually between 11 to 15 years of age. Though it is often said that it have to be done in a 3-stage process over several months, there is new research that shows that those who went for only the first set of vaccination ended-up still being protected against HPV. In some first world nations, this vaccination is subsidized by the state. However, it is still a long way in PNG for such government assistance to come into play. Gardasil vaccine at Pacific International Hospital is presently priced at 750.00 Kina for the first dose. As noted earlier, new research shows that it might be possible for one dose to be enough.

With the support given in 2014 by the Governor-General Sir Michael Ogio, by Lynda Babao-O'Neill, by Dadi Toka Jr. of Cancer Foundation, by Pacific Games 2015 sending over Tura, among others, Pacific International Hospital is now calling on all women's groups to send over a contingent on 27 September (walk starts at PIH) to make Globeathon 2015 PNG an even bigger event.

Email to [mktgpih@gmail.com](mailto:mktgpih@gmail.com) or text to 7155-8866 to pre-register your group. There is no fee to walk and T-shirts and refreshments will be given away.

**FREE SURGERIES FOR CLEFT LIP KIDS**

FREE SURGERIES FOR CLEFT LIP AND CLEFT PALATE WILL BE HELD IN OCTOBER AT THE PACIFIC INTERNATIONAL HOSPITAL COURTESY OF OPERATION OF HOPE DOCTORS FROM THE U.S.A. IF YOU HAVE A RELATIVE WITH CLEFT LIP, PLEASE SEND PATIENT DETAILS EITHER BY FACEBOOK, LIKING FB PAGE "PIHkinini Smile", OR EMAIL [publicrelationspih@gmail.com](mailto:publicrelationspih@gmail.com) OR TEXT TO 7155-8866.

2015 sponsors: Bougainville Copper Ltd, Brian Bell, Airlines PNG

## Be part of the top-tier facility of your profession!!



Nurses, Midwives, and CHW welcome to apply

send your CV to [donmary.pih@gmail.com](mailto:donmary.pih@gmail.com) and [publicrelationspih@gmail.com](mailto:publicrelationspih@gmail.com) or text 7155 8866





# Kandep kisim bikpela bagarap

**KANDEP** ilektoret long Enga Provins i kisim bikpela bagarap bihain long frost o aisi pondaun i kukim olgeta kaukau na kumu gaden.

Moa long 30, 000 manmeri long Kandep i kisim bikpela taim na Memba bilong Kandep Don Polye i nau singautim gavman na arapela manmeri long helpim pipel bilong en.

Nius ripot i tok olgeta hap bilong dispela ilektoret i kisim bikpela bagarap na ol manmeri i stat long lusim ples na i go stap long narapela hap



**Polye...Memba bilong Kandep.**

bikos ol i nogat kaikai.

Nius ripot i tok dispela ais birua i no kamap long Kandep tasol em i bagarapim gaden kaikai na laip bilong moa long

90, 000 manmeri i stap long Porgera-Lagaip, Wabag, Wapenamanda and Ambum tu i kisim taim.

Oposisen Lida Don Polye i wari tru long pipel bilong en na em i bin go skelim dispela bagarap long ples.

Polye i lukim pinis na em i nau askim gavman long helpim ol pipel bilong Kandep.

“Ol manmeri long ples i kisim bikpela bagarap. Mi singaut i go long gavman long luksave long ol pipel bilong yumi long Kandep.”

“Gaden kaikai long olgeta hap long Kandep i bagarap pinis. Sapos dispela frost birua i go het yet long wanpela wik, i luk olsem olgeta laip bilong manmeri long Kandep bai bagarap,” Polye i tok.

Enga provinsal edministreta Samson Amean i tok dispela ais i pondaun na bagarapim ol samting birua em i bikpela tru na provinsal gavman i tingting long opim wanpela tras akaun long larim sapot mani i kam long gavman na ol dono ejensi i ken go stap long hap.



**Frost: Ais i bagarapim ol kon long ples Kandep.**

## No gat developmen long NTI LLG

**Tony Sapan i raitim**

WANPELA memba bilong Namatanai Lokal Level Gavman i askim kaunsil i mekim wanem long stretim hevi bilong ol we i no gat wanpela developmen i kamap long hap bilong ol.

Steven Tagor i tok no gat developmen i kamap insait long NTI LLG na toktok bilong LLG presiden, Michael Singan long program bilong gavman bilong em long lukautim Namatanai maket na klinim Namatanai taun em ol toktok nating em bai i no inap bringim developmen i go insait long dispela LLG.

Mista Tagor i singaut long Mista Singan long no ken sutim tok long provinsal gavman long ol as tingting bilong en long wok na wanem em i laik mekim long developmen.

Em i askim Mista Singan long wok wantaim provinsal gavman long lukim olsem sampela wok developmen tru i kamap insait long Lokal Level Gavman. Mista Tagor i sutim tok long Mista Singan long mekim wantok sistem long givim lokal level gavman kontrak wok i go long wanpela kamapani ol bisnis. Em i tok dispela i no stret na bai no inap bringim developmen tru i go long NTI LLG.

Em i singaut long mista Singan long tok klia long hevi em i kamapim taim i no kamapim trupela developmen insait long LLG taim em i givim gavman kontrak i go long kampani ol bisnis bilong en i papa long en.

## Helikopta pailot trening bai kamap long Pot Mosbi

AUSTRALIAN Difens Fos (ADF) bai gat helikopta ekksesais trening wantaim Papua Niugini Difens Fos (PNGDF) Ea Trensport Wing (ATW) long Jacksons ples balus long Pot Mosbi.

Trening i bin stat long 16 Ogas i go inap long 7 Septemba, 2015 na ol manmeri husat i tren bai stat flaim helikopta i go antap long hai altitud long ol ples insait long Mosbi long

prektikel sait long trening bilong ol.

Ol bai yusim Blekhok trup lift helikopta long taim bilong trening.

Tiger Armed Reconnaissance helikopta em i wanpela nupela ami helikopta we em bai givim sevis long Australian Ami aviesen na ol bai no inap yusim long trening taim long PNG.

Helikopta C-17 Blobmasta bai helpim na sapotim dispela trening

na bai karim ol pipel na ekwipmen bilong ol helikopta ol bai yusim long trening.

Taim dispela ekksesais i kamap, ol mausman bilong PNG gavman bai toktok long join ekksesais bai kamap bihain long 2016.

Komanda bilong PNGDF, Brigadier Jenerel Gilbert Toropo, bai lukim ATW bilong PNGDF na bai tokaut wanem taim ekksesais bai

kamap namel long Australia na PNG long 2016.

Hetman bilong Australian Difens Staf, Kolonel Dick Parker, i tok, “PNG i gat hai altitud trening hap na mi amamas long gavman bilong PNG na ol patna bilong yumi i stap longt PNGDF i tok orait long kondaktim trening bilong yumi long PNG.”

## El Nino bai go het long 4-pela mun

**Esther Bralyn Wani i raitim**

NESENEL Weda Sevis (NWS) wantaim Nesanel Disasta Senta (NDC) i tok klia long El Nino o san i bagarapim olgeta ples. Dairekta bilong Papua Niugini NWS, Samuel Maiha wantaim Dairekta bilong NDC, Martin Mose i toktok long ol nius lain long Tunde long Pot Mosbi.

“El Nino em wanpela sisen i kamap long olgeta hap long wol na yumi i stap insait long El Nino na yumi em wanpela bilong ol kantri i kisim bagarap na bai go het long narapela 4 mun,” Mista Maiha i tok.

Mista Maiha i tok ol save man i tok dispela El Nino bai go het inap long Mas, Epril na Me long neks yia.

“Long PNG, i no gat gutpela nius long ren na ais i pundaun na long 4-pela mun bai yumi bungim wankain taim olsem yumi i lukim nau,” Mista Maiha i tok.

Em i tok PNG i lukim ples i drai na bai yu lukim no gat klaut long dispela taim na yumi pilim ples i no kol tasol i hot liklik na long apinun bai yu pilim kol.

Mista Maiha i tok long Hailans ples i save kol long wanem bai ais i pundaun na bai i nogut tru long dispela mun inap neks mun na go het long Oktoba.

Em i tok bai yumi lukim planti i go bikpela na bai gat planti bagarap i kamap long helt bilong ol pipel.



**Dairekta bilong PNG Nesanel Weta Sevis, Samuel Maiha na Dairekta bilong Nesanel Disasta Senta, Martin Mose.**

Mista Maiha i tok Ok Iedi i pas pinis na Fly Riva bai kam antap gen long Janueri.

“Rekot i soim olsem ren bai kam tasol, bikpela wari bilong mipela em watpo em i go longpela taim o em i isi, mipela tok 4-pela mun. Dispela bai putim presa long saplai bilong wara na sisen bilong planim kaikai

long planti ol sabsistens komyuniti,” Mista Maiha i tok.

Em i tok ol saintis i wari sapos em go het long neks yia bai ol kaikai i no inap gro hariap. Em i tok ol ruel komyuniti bai kisim bikpela bagarap long kaikai.

“Mi ting bikpela samting long mekim nau yet em long gat sampela

disasta rilif long ol dispela hap i kisim bagarap pinis tasol yumi mas tingim olsem olgeta pipel i no ken askim long disasta rilif. I mas i gat mani long mekim asesmen long lukim wanem eria i kisim bikpela bagarap.

Long wankain taim, Dairekta bilong NDC, Martin Mose, i tok ol i makim Disasta Rispons Komiti na bai gat 4-pela tim i go aut long 4-pela rijon. Em i tok ol bai makim ol hot spot o ol hap i kisim bikpela bagarap. Em i tok dispela em ol hap bin kisim bikpela bagarap long 1997 olsem Tambul Nebilya.

Mista Mose i tok em namba wan ples long Westen Hailans provins long kisim bagarap na olsem 40,000 pipel i kisim bikpela bagarap. Em i tok long Sauten Hailans long lalibu-Pangia olsem 50,000 pipel i kisim bagarap.

“Mipela bai nidim planti risos long wanem drai sisen bai stap longpela taim tasol i gat ol rot long ol pipel i ken helpim ol yet tu. Bai mipela i mekim awenes long ol pipel i ken redi na painim ol rot long sevim wara na kaikai,” Mista Mose i tok.

Em i tok Nesanel Disasta Senta long Pot Mosbi i no wanpela tasol wantaim plen, ol provinsal disasta senta mas gat plen bilong ol long karim aut ol disasta rilif wok na mipela i helpim ol wantaim ol bluprin na ol liklik buk.



# Ais i bagarapim ples long Westen Hailans

**Esther Bralyn Wani i raitim**

**EL Nino o taim bilong bikpela san na drai sisen i bagarapim planti ples long Papua Niugini (PNG).**

Ol pipel i lukim drai sisen long longpela taim na long Hailans rijon ais i pundaun long ol kol ples na bagarapim ol gaden kaikai.

Long Hailans ples i drai olsem tripela mun nau na planti pipel i no gat wara long dring, waswas o wasim klos. Dispela drai sisen i distebim nomal taim bilong skul na ol skul i wok long pinis long hap de.

Insait long Westen Hailans provins (WHP) na sampela hap bilong Enga na Sauten Hailans

provins (SHP) ol i kisim bagarap long ais. Bikpela bagarap i kamap long Tambul distrik insait long WHP we ples i save kol stret bikos em i stap klostu long bikpela maunten Giluwe we ol ais i pundaun na bagarapim olgeta gaden kaikai olsem, kaukau, kebis, brokoli, potato na ol narapela kaikai.

Wanpela lida bilong Lowa Kagul long Tambul distrik, Fidelis Kunamp, i tok em i no save lukim dispela kain bipo. Em i tok dispela i winim ais i bin pundaun long 1972 na 1997.

“Ais i stat pundaun long Tunde na em i pinis long Fraide tasol ol klaut i karamapim ples. Olgeta rop bilong kaukau i tanim go blek na taim mipela i

digim kaukau, mipela painim olsem ol bagarap pinis.”

Mista Kunamp i tok long 1972 em bin no gut tru na gavman bilong Australia i bin kisim ol kaikai saplai i go na tilim long ol, na ol i bin orait. Na 1997 tu i bin orait liklik, tasol dispela em i no gut stret.

“Mipela no inap stap orait. Dispela em i no gut olgeta. Em i drain olgeta grinpela kaikai na ol plent i kamap blek pinis,” Mista Kunamp i tok.

Em i tok ol i digim ol bebi kaukau long gaden na putim long haus na ol i kaikai liklik liklik long amamas de ol i no save.

Tasol, ol i wari olsem bai em i pinis klostu na olsem 4 inap 5 de na bihain ol i no save ol bai

kaikai wanem samting.

Long wankain taim, prinsipel bilong nupela skul, Kiripia Katolik Sekenderi skul, Augustine Kupa i tok, “No gat hevi long wara insait long skul tasol olsem hap populesen bilong ol sumatin i save slip wantaim ol wantok na kam long skul. Long dispela mipela i wari olsem ol bai givim hevi long ol waslain bilong ol long kain taim olsem long sait bilong kaikai.”

Mista Kupa i tok ol no stap aninit long sabsidi bilong gavman o Tuisen Fi Fri (TFF) polisi bikos em nupela skul.

Em i tok moa olsem wanem samting i kamap, bai ol i harim toksave long Dipatmen bilong Provinsel Edukesen long go het long skul o no gat.



**AIS KILIM GADEN:** Ol kaukau lip i tanim go blek, ol kumu lip i drai na olgeta wara tu i drai. Dispela ol gaden long Kikua Viles long Apa Kagul insait long Tambul Distrik. *Alex Halu*

## Hevi bilong san i kilim 8-pela pipel

**Paul Zuvani i raitim**

RIPOT nau i kamap i tok 8-pela pipel i dai bikos long stropela san i bagarapim ples.

Dispela hevi i kamap long Simbu na Hela provins.

Long Simbu provins, ripot i tok 5-pela lain i dai bikos ol i kisim sik disentri o pekpek wara bihain long ol i dringim wara nogut na 23 haus i paia long hat bilong san.

Memba bilong Kundiawa Gembogl Tobias Kulang i tok distrik bilong em i bungim bikpela hevi bikos kol i bagarapim gaden kaikai na ol wara i drai we ol manmeri i save go longwe long painim wara.

Em i givim ripot pinis long Nesenel Disasta opis na wetim helpim bilong ol.

Long dispela taim Simbu provinsal gavman i askim nesenel gavman long kamapim emejensi long helpim ol manmeri long provins.

Ripot i tok inap olsem 300,000 manmeri long 9-pela provins we 7-pela long Hailans wantaim Is na Wes Nu Britain provins i bungim hevi we wara i drai na kaikai i sot.

Long Komo Magarima distrik long Hela provins ripot i tok tupela mangi krismas bilong ol



**obias Kulang, Memba bilong Kundiawa Gembogl, distrik bilong em i wanpela long ol we i bungim hevi bilong san na kol.**

i stap long 8 na 10 i dai bikos ol i no kisim kaikai inap long sampela de bikos kaikai i sot.

Na ol manmeri i askim Hela provinsal gavman long hariap na kamapim disasta plen long helpim ol manmeri.

Long Sentral provins ol pipel long ples Kosipe long Woitape i lusim ples bilong ol na go long ol arapela ples long Goilala distrik olsem Sopa, Kirime na Taripai long painim helpim bikos kol i kilim gaden kaikai bilong ol.

Singaut i go pinis long Sentral provins disasta opis long givim helpim

tasol i nogat ripot i kamap sapos provinsal disasta opis i go long dispela hap, kisim ripot na kamapim plen long helpim ol manmeri long dispela hap o ol arapela hap bilong provins.

Long Kandep distrik, Oposisen lida na memba Don Polye i kamapim disasta komiti long distrik bilong em.

Komiti i bilong luksave long hevi we drai sisen, o strongpela san ol i kolim El Nio i kamapim.

Gavman na ol save-man i tok lukluk bilong san i stat tasol bilong moa hat san long

kamap na gavman yet wantaim ol manmeri i mas kamapim plen na luksave long ol rot long abrusim ol hevi.

Mista Polye i bungim ol opisa long distrik na kamapim disasta komiti.

Dispela komiti em wanpela pater bai go pas long en.

I gat ripot olsem 72,000 manmeri long distrik i bungim taim nogut we san i hat long de na i kol moa long nait.

Kol bilong nait i go long 15 na 10 digri sel-sis na i kilim dai planti gaden kaikai. Manmeri i sot long kaikai.

Mista Polye wantaim komiti i plen tu long opim benk akaun we bai askim ol manmeri husat i laik givim helpim.

Mani ol i kisim bai helpim long baim rais, flaua na wel bilong kuk.

Polye i askim provinsal na nesenel disasta opisa long go long distrik na kisim gut ripot long hevi i kamap na wanem kain helpim ol i mas givim.

Long givim helpim long ol manmeri long kantri Nesenel Disasta opis long Waigani i tok taim ol provins i askim nesenel disasta opis long helpim, wankain taim ol tu i mas kamapim ripot na ol plen long rot ol bai yusim long helpim ol manmeri long provins bilong ol.



# GoPNG Portal i redi long wok nau

Frieda Sila Kana i raitim

**DIPATMEN bilong Infomesen, Komunikesen na Teknologi nau i gat wanpela websait ol i kolim Portal we ol bai putim ol toktok bilong dipatmen na ol narapela hap han bilong gavman long olgeta pablik na gavman na ol lain ausait long kantri bai kisim ol tok save na ol stori bilong wok bilong gavman bilong Papua Niugini.**

Minista bilong Infomesen, Komunikesen na Teknologi, Jimmy Miringtoro i bin opim dispela websait long Fraide las wik.

Minista i bin tok olsem ol gavman long olgeta hap bilong wol i kamapim pinis ol portal bilong ol olsem namba wan tu bilong salim ol tok save bilong kantri i go aut.

Em i tok, portal bai givimaut ol trupela toktok long stretim tingting bilong ol pablik bikos planti taim ol sosel midia i save bagarapim nem bilong kantri na stori nogut i save kamap long intanet.

"Wantaim dispela gavman portal mipela bai stretim tingting bilong ol man na autim tok tru long ol pipel bilong PNG i ken save long kantri bilong ol yet," Mista Miringtoro i tok.

Tingting baksait long dispela Portal em long kamapim wanpela win-

dua o ples tasol long olgeta lain i mas kisim ol gavman dairektori, on-lain sevis, nius na toksave bilong ol wan wan han bilong gavman na ol narapela grup i save wok wantaim gavman.

Em bai kamap wanpela hap tasol we ol teknikel opisa bai inap long putim ol nupela tok save bilong Gavman olgeta taim.

Em bai opim dua bilong i go insait long ol gavman dipatmen websait, na bai mekim rot long gavman inap salim ol stretpela tok save i go long pablik. Em bai larim ol pablik long givim bek ol tingting bilong ol o bel wari bilong ol komplem bilong ol, painim wok insait long ol gavman ejensi, long kisim ol investa bisnis eplikesen na ol eplikesen fom bilong ol wok pemit, paspot, marit, bon de, na ol narapela eplikesen fom, tok save long helt, legal toktok, ol pablik ameniti na sekyuriti na ol wok bilong ileksen na ol tok save bilong en.

Seketeri bilong Dipatmen bilong ICT, Paulias Korni i tok em i salim ol pas na tok save i go pinis long ol sista dipatmen na ol gavman ejensi long ol i mas salim ol link bilong ol i kam insait long dispela sentral gavman portal.

"Em bai kamap wanpela databes bilong gavman dairektori long



(L-R) Ol opisa bilong Dipatmen bilong ICT wantaim disaina na Minista Miringtoro wantaim Seketeri Korni i kisim foto bihain long opim Gavman Portal. Foto: ICT midia

tokaut long ol husat bikman na bikmeri i stap insait long ol ministri, dipatmen na ejensi bilong gavman," Mista Koni i tok.

Seketeri Korni i tok tenkyu na mekim luksave long Marko (PNG)

Ltd, em ol teknikel lain husat i helpim ol IT wokman long dipatmen long kamapim dispela portal.

"Mi askim PNG APEC Seketeriet long yusim dispela Gavman Portal long putim aut olgeta tok save bi-

long wok redi bilong APEC 2018 miting bilong ol Lida. Opis bilong mi bai wok klostu wantaim APEC Seketeriet long dispela," Mista Korni i tok.

## Kandep bai kisim kaikai saplai long helpim pipel

Stanley Nondol i raitim

KANDEP distrik bai namba wan distrik long Enga provins long kisim ol rilif saplai bihain long bikpela san i bagarapim ol gaden na ples bilong moa long 300,000 pipel long provins.

Kandep Distrik Development Atoriti (DDA) siaman na Oposisen lida Don Polye i bin go lukluk raun long ol bagarap i kamap long distrik na em i tokaut olsem DDA bilong em i putim K2 milien long ol pipel husat i kisim bagrap na bai ol i kisim helpim hariap.

Longpela taim ren i no pundan long Hailans na ais o fros i kamap long 6-pela distrik bilong Enga na bagarapim gaden kaikai bilong ol ples lain.

Wara i sot tu na planti skul i kisim taim nau. Kandep distrik nau i wok hat long givim saplai bilong ol stua kaikai long ol pipel. Mista Polye i edvaisim ol wokman long distrik long i no ken westim taim long bihainim longplea rot bilong yusim mani na singaut long ol i mas hariap long yusim

K2 milien long givim kaikai. Em i no laik wanpela man, meri o pikinini i dai long dispela taim nogut.

"Ol pipel i kisim taim na saplai bilong kaikai i mas go long ol kwiktaim" Polye i tok.

"Mi no save lukim kain disasta o bikpela bagarap long bipo. Dispela i wanpela bikpela hevi na olgeta lida long provins, distrik na ol pablik sevan i mas wok bung long givim kaikai saplai long ol pipel kiwik taim, na i no bilong westim taim," Polye i tok.

Pasta Sheik Medel bilong Apostolik Sios i singaut long Mista Polye na distrik edministresen long givim kaikai saplai long ol pipel huat i kisim bagarap long ples.

Mista Medel i tok bikpela populesen bai inap long kisim bagarap na planti i ken lusim laip sapos kaikai saplai i no kamap hariap.

Wanpela man bilong ples, Mathew Halo i tok ais i bagarapim gaden kaikai na ol sid na nupela pikinini kaikai bilong gaden na ol pipel bai kisim taim long wokim nupela gaden

## Hela wari long Potape



Ol pipel bilong Hela wantaim ol pipel I bungim Komo Magarama memba Francis Potape long Tari ples balus long wikend.

MOA long tausen manmeri long olgeta hap biking Hela I bin kamap long Tari peles balus long welkamim Memba bilong Komo Magarama Francis Potape.

Ol pipel bilong em I no bin kisim sevis taim em bin kalabus long Seven pla mun na nau em nambawan taim ol I bungim em.

Ol i raitim sampla tok antap long bot olsem MIPELA LUSIM YU, TRUPLA LIDA BILONG MIPELA. Insait long wokabout bilong em wantaim memba bilong imobogu na Minister bilong Woks Francis Awesa I bin ron wantaim na ol arapela Hela Provinsol Adminstreta William Bando na Ekting Gavana bilong Hela Thomas Potape I

bin wokabout wantaim ol long Halapi Kaunsil Semba insait long Hulia Lokol Levlo Gavaman Eria.

Long dispela taim ol pipol I kilim moa long wan tausen pik sixpla kau, na fifti pela laip pik givim olsem presen I go long Memba Potape.


Mista Potape i tok mi lusim long yupla husat i kisim mi long

kot na Papa God i helpim mi na soim gutpela we bilong lidim pipel bilong em.

Em i tok dispela I no namba wan taim mi go long en, planti taim mi sanap long kot long 2007 na mi win gen na nau gen kot kalabusim mi na stap sevan pla mun na kam aut bai dispela i strongim gut tingting bilong mi.



# Crocodile Prais Awat bung i kisim K30,000 helpim



**OL i redi pinis long go het long 2015 Crocodile Prize awat bai kamap long Kundiawa long 18 na 19 Septemba.**

Presiden bilong Crocodile Prais Ogenaisesen, Jimmy Drekore, i tok ol raita, ol sponsa na ol pren bilong Crocodile Prais nesanel litreri kompetisen o resis husat i laik stap insait long dispela bung i mas stat long redi long go long Kundiawa.

“Ol pipel husat bai kisim balus i mas mekim buking i go long Kagamuga ples balus long Maun Hagen, long Fonde 17 Septemba.

“Ol memba bilong Simbu Raitas Asosiesen (SWA) we i holim dispela bung bai kam kisim yupela long Kagamuga ples balus,” Mista Drekore i tok.

“Bai ran tupela awa long bas i go long Simbu na lusim Jiwaka na lukim naispela lukluk bilong biknem Wagi Veli.”

Mista Drekore i tok em i bikpela samting olsem olgeta pipel husat bai go stap insait mas ringim em bipo long pinis bilong Ogas, na ol i ken redim gut ol samting.

Minista bilong Edukesen na memba bilong Gumine, Hon Nick Kuman, bai namba wan spika long dispela bung, we bai lukim 8-pela namba wan PNG raita i kisim ol tropi.

Namel long ol dispela bikpela ges, olupela kiap, Bob Cleland, husat i wanpela bikpela man long wokim bilong Hailans Haiwe long 1950s.

Planti ol Crocodile Prais sponsa, wantaim ol opisel long Paga Hil Developmen Kampani,

bai kam stap insait long bung tu.

Insait long dispela bung, ol pipel i stap insait bai toktok long ol bikpela samting long bihain bilong Crocodile Prais edministresen.

“Keith Jackson na Philip Fitzpatrick, ol pipel i stap bihain long dispela gutpela edministresen bilong litresi kompetisen inap nau, bai i larim ol Papua Niugini long kisim ples bilong ol,” Mista Drekore i tok.

Em i makim maus bilong SWA na tok

tenkyu long memba bilong Sinasina-Yongomugl na olupela foma Atoni Jenerel Kerenga Kua husat i givim K20,000 na memba bilong Alotau na Minista bilong Nesanel Plening na Implementesen, Charles Abel, long givim K10,000 long dispela bung.

## Ol bikman bilong edukesen i bung

**Esther Bralyn Wani i raitim**

EDUKESEN Sekta Impruvmen Program (ESIP) komiti i holim namba wan bung bilong ol long las wik Fraide long Pot Mosbi. Ol i bung long mekim gut edukesen long Papua Niugini (PNG) we las bung i bin kamap long 2011.

ESIP i kamap wantaim ol bikpela stekholda bilong edukesen olsem ol gavman dipatment, ol dona, ol NGO, ol sios na ol sivil sosaiti.

PNG na ol developmen patna i kamapim wanpela Sekta Waid Aproj (SWAp) long edukesen plening, baset, monitoring na ivaluesen i kamapim ESIP.

Dispela komiti bai givim edvais na gaidens long Seketeri bilong Dipatmen ov Edukesen, gavman bilong PNG, ol provinsal edministresen, ol developmen patna na ol stekholda bilong developmen na mekim ol prinsipal bilong SWAp long Edukesen Sekta long PNG.

Dispela bung i kamap gen long opim gen dispela program namel long 2007 na 2011 i wok long lukim ol polisi na ol spending long olgeta edukesen sekta long PNG.

Long dispela bung, Edukesen Seketeri bilong Edukesen, Dokta Uke Kombra i stap siaman long en.

Dokta Uke i askim ol narapela sekta o dipatmen long toktok na skelim tingting bilong ol long wanem kain program o plen ol i ken bihainim long kamapim kwalati o gutpela edukesen long PNG.

## Mariwana bagarapim skul pikinini

**Aja Potabe i raitim**

MARIWANA o spakbrus i wok long bagarapim laip bilong planti manmeri insait long kantri.

Dispela em i toktok bilong Lawrence Tau bilong Nesanel Nakotiks Bureau (NNB).

Tau i tok dispela drak i wok long laip bilong planti yangpela manmeri long dispela kantri na gavman i mas mekim moa wok awenes na givim skul toktok long ol pipel long noken smukim dispela spakbrus.

Tau i tok planti ol yangpela skul pikinini i wok long smuk drak na lus tingting long mekim skul wok.

“Planti ol yangpela skul pikinini long Mosbi i save smuk mariwana. Ol papamama i ting mariwana em i no wanpela nogut samting. Tasol bagarap mariwana i save mekim long tingting na

bodi bilong man em i nogut stret,” Tau i tok.

Em i tok gavman i mas strongim ol loa bilong smukim, salim na planim mariwana.

Sampela kantri klostu long PNG olsem Indonesia na ol arapela Asian kantri i gat strongpela loa long kalabusim ol man husat i smukim mariwana.

“Indonesia gat strongpela loa long drak. Ol bai kilim yu sapos ol i holim yu salim, smukim o planim mariwana long Indonesia,” Tau i tok.

Tau i tok maski em i wok long givim ol awenes toktok long ol skul na pablik ples, ol manmeri i harim tasol ol i wok long smukim mariwana yet bikos loa i no strong tumas long stopim ol manmeri long planim, smukim na salim mariwana.

Tau i laikim gavman long strongim ol loa bilong mariwana bikos dispela drak i



wok long bagarapim gutpela sindaun na futsa bilong ol yangpela pikinini bilong dispela kantri.

Pastaim dairekta jeneral bilong NNB John Mapusa i givim tok lukaut long ol yangpela manmeri long noken tat-

sim dispela drak.

“Bai yu no inap kisim wanpela gutpela samting long mariwana. Mariwana i save bagarapim laip na tingting bilong manmeri. PNG mas i tok nogat long drak,” Mapusa i tok.

## PNGAAA i opim namba wan woksop

PAPUA Niugini (PNG) Australia Alumni Asosiesen (PNGAAA) i holim namba wan Lidasip woksop long “Eksekuting Streteji” wantaim ol bikpela opisa long praivet na pablik sekta long Pot Mosbi.

Ivan Choi, Prinsipel na Inovesen Prektis Lid bilong Palladium Kampani grup i go pas long dispela woksop long lukluk long ol gutpela prektis long plenim na karim aut plen.

Dokta Teatulohi Matainaho, Presiden bilong PNGAAA i amamas long strong bilong ol Lidasip Dailog wantaim sapot bilong gavman bilong Australia. PNGAAA i

amamas long kamapim wanpela hap we ol lida i ken bung long senisim ol tingting na save long go het long senisim ol wok insait long ogenaisesen bilong ol.

“Em i gutpela woksop we mipela i tingim olsem mipela i mas bildim spes bilong ol lida long olgeta level long wanem bai helpim long developmen bilong Papua Niugini,” Dokta Matainaho i tok.

“Mipela i mas tingting gut long ol rot long helpim kantri long lukim ol salens i kamap long wol.”

Ol pipel bilong Alumni long woksop em; Deputi Seketeri bilong Pablik

Sekta Rifom (DPM), Agnes Friday, Jenerel Menesa bilong Origin Energy PNG, Lesieli Taviri, Ekting Seketeri bilong DHERST, Dokta David Kavanamur, Edita in Sif bilong Post Courier, Alexander Rheney, na Asisten Dairekta bilong Pefomens Monitoring na Kodinesen Divisen (DPLGA), Christine Boude.

Dispela PNGAAA i bin stat long 2006 long givim ol Papua Niugini husat i bin stadi long Australia wantaim ol rot bilong go het long developmen long PNG na sapotim ol narapela lida.



PNGAAA i opim namba wan woksop.



# Kisim banis marasin em yu kisim laip

# Planti das karamapim Modilon haus sik long Madang

**Frieda Sila Kana i raitim**

**DIPATMEN bilong helt pablik helt divisen i gat bikpela tingting long winim mak bilong bilong ol pikinini i save dai long taim ol i no kisim namba 5 krismas bilong ol yet insait long Papua Niugini.**

Olgeta rot bilong stopim dai long kamap long taim bebi i stap yet long bel bilong mama o long taim em i karim pinis. I gat rot tu long stopim bebi long em i no ken gat sampela bagarap long bodi pastaim long em i bon o bihain long em i bon.

Papua Niugini i stap namel long ol kantri long wol husat i gat mak i antap tru long namba bilong ol bebi i save dai, na tu long ol mama i save dai na tu long ol pikinini i save kamap wantaim bodi krungut, lek na han i krungut o sampela pat bilong bodi i kamap gut. Tasol nau i gat ol gutpela banis marasin o vaksin i stap long stopim ol sampela kain bikpela sik olsem

Misels Rubela na Polio na Numonia.

I gat banis marasin bilong ol dispela sik i stap pinis long kantri we las wik Praim Minista Peter O'Neill i bin opim long haus palamen. Dispela ol vaksin o banis marasin bilong Misels/Rubela na Inactivated Polio Vaksin nau bai stap long olgeta helt klinik na haus sik long kantri.

Minista bilong Helt wantaim Praim Minista wantaim olgeta bikman na bikmeri bilong helt na ol patna olsem WHO, Gavi Alaiens bilong Vaksin, UNICEF na ol narapela gutpela lain husat i save helpim long bringim ol gutpela marasin bilong banisim ol pikinini long ol sik we i save kamapim dai, i singaut strong long ol mama na papa bilong ol pikinini na long komyuniti i mas bringim ol pikinini i kam long haus sik o ples bilong bung long ol i mas kisim dispela nupela vaksin antap long ol narapela ol i save kisim pinis.

Em i tru olsem sik polio i bin pinis olgeta long kantri

long 1997, na long wol em i gat 3-pela kantri tasol i gat dispela sik yet.

Tasol tingting bilong Wol Helt Ogenaisesen na ol gavman em long pinisim tru dispela sik polio long dispela graun. Olsem na olgeta mama nau i mas kisim ol pikinini bilong ol husat krismas bilong ol i aninit long 15 yia long ol i mas go bek na kisim gen narapela dos bilong IPV o vaksin bilong polio. Na tu ol i mas kisim gen narapela dos bilong Misels/Rubela long stopim sik misels long em i no ken kisim bebi long taim mama i karim na long taim em i stap yet long bel.

Olsem Sif Eksekutiv Opisa bilong Gavi Vaksin Alaiens long Esia Pasifik Rijon, Helen Evens i tok olsem, "Sik smol poks i bin pinis olgeta long wol, olsem na polio na misels tu i ken pinis long wol sapos yumi katim rot bilong em long go moa long ol narapela pikinini. Na dispela we em long kisim banis marasin o imunaisesen tasol."



**Planti baret, bagarap na moa das long Modilon rot i wokim dispela tupela lein rot i kamap olsem foa-lein rot kwiktaim tru. Foto: James G. Kila**

**James G. Kila i raitim**

**OL SIKMAN** meri long Modilon Jeneral haus sik long Madang provins long nau yet i no kisim klinpela win bikos win i karim bikpela das long Modilon rot i go insait long haus sik eria.

Dispela em wanpela hevi we i stap longpela taim tasol nogat man long atoriti o ol lida bilong Madang provins em planti save kolim ol yet 'matu' i wokim wanpela samting o toktok strong long Woks Dipatmen long stretim dispela rot we i kamapim planti das long Modilon rot.

Wanpela long-taim man long Madang taun, Nicholas Saun i tok Woks Dipatmen long Madang na na ol lida bilong Madang i mas lukluk moa long stretim dispela rot seksin we nau i kamapim bikpela das nogut na bagarapim tru Modilon Haus Sik we planti sikman meri na pikinini i stap long en.

Dispela seksin bilong mein Modilon rot namel long haus sik na 3-lain stua rot na Emmanuel Luteran Sios, we ol wok lain bilong rot i rausim ol diwai na kolta long rot na nau yet dispela hap i kamapim moa das. Nau em drai sisen na san i hot tru na das bilong dispela rot i givim hat taim tru

long ol manmeri i wokabout long rot i go kam.

"Planti ol mama i karim ol nupela bebi na wokabout i go kam long dispela rot na kain bikpela das i kamap i no gutpela tru" Saun i tok.

"Das I wok long kamapim kus tu long ol pablik manmeri," em I tok.

Em i tok wod bilong ol mama bilong karim pikinini tu i stap arere tasol long rot, na em i no gutpela stret long lukim bikpela das i blo i go olsem long Modilon haus sik.

"Long sait long helt em i no gutpela long das nogut long blo i go olsem long haus sik eria bikos planti sikman meri na lain i gat sik sot-win o kus o asma i stap." Saun i tok

Em i tok tu olsem wol bilong haus sik i pulap long das na sori tru olsem nogat ren i pundaun longpela taim na ol das i bung na pulap antap long kapa na wol bilong haus. Dispela em i no gutpela tumas long helt bilong ol sikman meri long haus sik

Bas stop bilong Modilon haus sik we stap arere long Madang CODE i save bungim hat taim tru long das na bikpela win. Ol bikpela diwai na flaua na gras arere long rot em das i karamapim stret na ol i go kamap wait.

Planti lain i wok long toktok i go kam long dispela rot i kamapim das tasol no gat samting i kamap long stretim yet.

Long las mun wanpela bisnis haus long Madang i yusim wara trak bilong en long kapsaitim wara long dispela rot long stopim das. Bihain long dispela no gat arapela lain i wokim

Planti ol lain long Madang i wok long kros na mekim planti toktok na sutim tok i go kam, tasol ol lida long provins olsem Memba bilong Madang, Nixon Duban na Gavana bilong Madang, Jim Kas i no wokim wanpela samting long stretim dispela hevi long bikpela rot i go insait long Madang taun.

Nau yet ol sumatin i save yusim krosing long moning long go kam long skul na das i save bagarapim ol stret.

Saun i tok kain ol hevi i stap long Madang tasol ol lida man bilong Madang o 'matu'blong ples no save toktok strong o wokim samting long stretim ol hevi we i ken bringim gutpela long ol manmeri.

Em i tok ol lida bilong Madang em gutpela long toktok planti, tasol ai bilong ol i pas long kain hevi i stap we i givim hat taim long ol manmeri na pikinini.



**Minista bilong Helt long PNG, Michael Malabag i toktok long taim bilong opim nupela vaksin bilong Misels Rubela (MR) na Inactivated Polio Vaksin (IPV) long Stet Fanksen rum. Gavi Vaksin Alaiens CEO, Helen Egens na Praim Minista Petr O'Neill i sindaun long fran.**

Foto: Gavi Vaksin Alaiens

# Mobail fon inap long rausim fat long bodi

**OL MOBAIL** fon inap long kamap olsem tiket bilong stopim obesity weit o long bodi long gro pat tumas na bai helpim ol yangpela bilong Australia long stap helti, olsem wanpela nupela risets bilong Yunivesiti bilong Sydney, Charles Perkins Senta i tokaut long en.

Ol saveman bilong risets i kamapim wanpela namba wan kain risets bilong yusim mobail fon long helpim ol yangpela husat i wok long bihainim rot bilong kamap pat tumas. Ol i ken yusim mobail fon long salim teks, yusim mobail fon aplikesen, email, salim ol stori bi-

long ol gutpela helti kaikai na long skulim ol long fon. I gat sampela yangpela bilong Australia husat i go insait long dispela risets wok i wok long lusim planti gris long bodi, na inap long mekim moa strongpela wok na pilai, na ol i wok long kaikai moa kumu na ino dring suga dring o loli wara tumas..

"Ol yangpela man na meri i wok long gro pat moa long ol narapela laip pipel. Ol i gat namel mak bilong BMI long 18 i go 24 krimas lain nai i gat weit i winim mak bilong en," rists save meri Profesa Margaret Allman-Farinelli bilong Yunivesiti bi-

long Charles Perkins Senta na Fekalti bilong Sairens i tok.

"Ol yangpela lain pipel em ol i las lain tru long kaikai ol prut na kumu tasol ol i namba wan tru long kaikai ol kain kaikai i gat planti suga insait long ol. Ol bai laikim ol kain kaikai bilong haus kai moa.

"Mipela i save olsem sapos ol yangpela i kisim moa gris long bodi em bai stap wankain tasol long laiptaim bilong ol, na bai em i opim dua long ol inap kisim ol strongpela sik olsem daiabitis na cardiovascular o sik long lewa. Sapos yumi stopim hariap em bai mekim

bikpela senis long laip bilong ol,

"Em i no gat wanpela strongpela wei bilong stopim ol yangpela long dispela," Profesa Allman-Farinelli i tok.

Intavensen, TXT2BFiT, em ol i bilip olsem bai namba wan tru long wol we em i sut stret long ol yangpela piple husat i save yusim mobail teknoloji na em i wanpela program we ol saveman na meri i kamapim bilong ol stret, na ino bilong ol bikpela man na meri. Ol i bin pablisim dispela risets insait long JMIR mhelt na uhelt.

Program i save ran long 12-pela wik. Em i save gat taim bilong salim

ol gutpela toktok long teks long givim gutpela tingting, 5-pela tok stia long wan, wan yangpela man na meri long bihainim program, wanpela email long wan, wan wik na long kisim ol mobail fon aplikesen wantaim we i gat paswod long givim edukesen na long ol i ken sekim program bilong ol yet.

Wanpela grup bai kisim tupela hap pepa, wanpela fon kol long toksave long program, 4-pela teks wantaim toktok insait long 12-pela wik na ol i ken go long websait wantaim ol bikpela toksave bilong dispela stadi program.



# WOW Awat 2015 i op

**WESTPAC Outstanding Wimen (WOW) Awat 2015 i op long ol meri husat i mekim sampela gutpela wok long helpim kantri long develop.**

Westpac benk i laikim husat meri i bilip long ol yet long votim ol yet o votim narapela meri long kisim Westpac Outstanding Women Awat.

Ol spona bilong Westpac na Westpac i luksave long meri husat i gat han mak long developmen bilong Papua Niugini (PNG) taim ol i soim li-

dasip long mekim gut long ol wan wan eria i stat long yia 2007.

Ol eria olsem long praivet na, publik sekta, komyuniti, bisnis na ol yanpela i mekim sampela bikpela samting.

Makim wanpela meri yu save em inap long winim PricewaterhouseCoopers Praivet Sekta Awat, Steamships i no bilong win mani Awat, SP Brewery Entraprana Awat, Trukai Komyuniti Awat, IBBM Yangpela Asiwa Awat, Pasifik Asurens

Grup Publik Sekta Awat na Moore Printing Spots Awat.

Ol prais em wanpela tropi na K5,000 edukesen gren. Olgeta WOW Awat bai ol i givim long wanpela bilong ol kainkain ol awat wina.

Olgeta nominesen bai go long dro long winim wanpela bilong ol tripela Westpac Mastakat Gif Kat.

Sekim ol Wetpac benk long kisim ol nominesen fom o sekim long intanet.

*WOW awat i op*



**Yut, Meri na Famili**

*Pastor*

*Barbara Lunge*

## God i wari long gaden wain bilong em

GOD em i papa bilong gaden wain na olsem em i save wari long em i mas lukautim gut. Ol pipel bilong God long Israel na Sios bilong Jisas Krai em i gaden wain bilong God. Em i save amamas tru long dispela gaden wain na em i save laik lukautim.

Buk Aisaia i tok long 5:1-2 olsem, "Mi laik singim wanpela song bilong pren bilong mi. Dispela song i stori long gaden wain bilong en. Antap long liklik maunten long hap graun i gat gris pren bilong mi i bin wokim wanpela gaden wain. Em i bin brukim graun na rausim olgeta ston na planim ol gutpela gutpela han bilong diwai wain. Namel long dispela gaden em i bin wokim haus bilong em i ken i stap na was long gaden. Na long wanpela ples ston em wokim hul olsem tang bilong krungutim na memeim ol pikinini wain. Olgeta wok i pinis na em i ting olsem, 'Ol diwai wain bilong mi bai i karim gut tru, na ol pikinini wain bai i swit moa yet.' Tasol nogat. Ol diwai i no karim gut, na ol pikinini i liklik tru na i pait long maus."

Dispela em i wanpela song bilong pren bilong em insait long gaden wain. Dispela song em i soim naispela piksa bilong wanpela man i laikim tumas meri bilong em, i soim man i laikim wain gaden bilong en na i stretim wantaim han bilong em yet.

Insait long buk bilong Sefanaia 3:17 tu i tok, "God, Bikpela bilong yupela i stap wantaim yupela. Strong bilong en i helpim yupela na yupela i winim pait. Bikpela bai i amamas long yupela na mekim song olsem ol manmeri i amamas long bikpela de bilong lotu. Em i laikim yupela tumas, na em i no mekim wanpela tok."

I gat was tawa long gaden na long olgeta hap bilong gaden i gat banis bilong yumi olsem ol Kristen. Yumi mas i stap insait long gaden bilong pasin bilong laikim na bai yumi ken kamapim kain pasin bilong Krai.

Yumi long olsem em i laik lukim ol gutpela prut tasol nogat ol prut i kamap i nogut na i no swit. Wara bilong prut em i pait o sawa na ol i strongpela tumas. Oloman, em i wanem kain prut ya!

Em i wok long lukluk tasol long painim stretpela pasin tasol em i lukim ol man i kilim ol yet na blut i kapsait nabaut, na planti hevi na bel kra i stap. Long dispela taim nau BIKPELA God em i laikim yumi mas i stap insait long laikim bilong em long kamapim ol prut bilong kingdom.

Ritim dispela long Galesia 5: 22-24 "Tasol Holi Spirit i save kirapim yumi long mekim ol gutpela pasin olsem, pasin bilong laikim tru ol arapela na pasin bilong amamas na pasin bilong i stap bel isi na pasin bilong i no belhat kwik na pasin bilong helpim ol man na mekim gutpela pasin long ol na pasin bilong wokabaut stret oltaim, na pasin bilong i stap isi na pasin bilong daunim laik bilong olpela bel. I no gat wanpela lo i tambuim ol dispela kain pasin.

Olgeta manmeri bilong lain bilong Krai ol i kisim olpela bel wantaim ol laik na mangal nogut bilong en, na ol i nilim pnis long diwai kros na em i dai pinis. Holi Spiri tem i givim laip long yumi, olsem na yumi mas larim Holi Spirit i stiaim olgeta wokabaut bilong yumi."

**Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com**

## Ol meri i opim poltri projek

**Veronica Aure i raitim**

OL Manuvatave Wimen Asosiesen long Saut Nasioi kontituensi bilong Sentral Bogenvil i opim namba wan poltri projek long 3 Me long dispela yia. Ol pipel i makim Australia Hai Komisn, ol Non-gavman ogenaiesen (NGO) na ol komyuniti i bin kam lukim.

Program Menesa wantaim Australia Hai Komisn, James Kop i tok tenkyu long ol meri long pinisim dispela poltri projek gut.

"Dispela projek bai kisim mani kam insait na bai i senisim na developim em ol komyuniti sapos yupela i mekim olsem wok bilong yupela na lukautim gut," Mista Kop i tok.

Long wankain taim, siameri bilong grup, Jennifer Dauka, i tok dispela projek ol meri man bilong ol i dai pinis i bin statim long 2005 tasol no gat mani long go het na ol i bin kisim taim inap gavman bilong Australia i givim mani insait long Strongim Pipel Strongim Nesen (SPSN) program.



**Ol Manuvatave Wimen Asosiesen i tok welkam long ol bikman na meri long taim bilong opim dispela poltri projek. Strongim Pipel Strongim Nesen (SPSN)**

"Mipela i amamas olsem Lokal Grent Komiti i tingim mipela long dispela mani na mipela i promisim gavman bilong Australia na SPSN olsem bai mipela lukautim dispela projek gut na mipela bai helpim ol narapela meri grup long Saut Nasioi," Misis Dauka i tok.

Em i tok ol i gat ol kastoma long Arawa, Koromira, na Kongara 1 na 2 husat i go baim ol kakaruk bilong ol.

"Planti pipel i laik baim ol kakaruk na sampela ol bisnis haus long Arawa taun tu i laikim mipela i ken saplaim ol," Misis Dauka i tok.

Em i tok moa olsem dispela

projek i go gut long Sentral Bogenvil na bai i helpim ol meri long komyuniti long stretim laip na sindaun bilong ol.

Gavman bilong Australia insait long SPSN program i givim mani inap olsem K64 873.50 long sapotim dispela poltri projek.




**MIPELA KAMAP WAN YIA: Women In Binis, i amamas wanpela yia bilong Womens Micro Benk bilong ol. Long Fraide 14 2014, ol bin opim dispela liklik benk bilong ol. Na long dispela yia 2015 ol kamap wan yia. Dispela benk i stat liklik 2014 na long 2015 em kamap bikpela benk tru bilong ol meri. Meri go pas long kamapim dispela bek wantaim helpim bilong ol sampela bikman, Jenet Sape i bin amamas tru long lukim dispela hatwok bilong ol meri long kantri i kamapim dispela benk bilong ol yet.**

Long amamasim dispela wan yia, namba tu Komisina bilong BPNG na Siaman bilong Women In Binis i kam stap long amamas wantaim ol wok manmeri bilong Womens Micro Benk long las wik Fraide.

POTO STORI: Nicky Bernard.



# No ken yusim taim bilong hevi long mekim mani ...Wokim samting stret



**GLASIM TOK**  
wantaim  
Fr Lollington Wiam

## Santu Eukaris em bung bilong yumi wantaim God

LONG las Sande Santu (Jon 6: 51-58) i stori long dispela spesel Santu kaikai em bodi na blut bilong Jisas. Jisas i givim long yumi kaikai bilong heven.

Dispela kaikai em Bodi na Blut bilong em yet. Man i kaikai Bodi na dring long Blut bilong Krai em i stap wantaim Krai na Krai i stap wantaim em.

Em Jisas i kamapim stretpela tok na i no haitim em yet. Em yet givim long yumi tasol yumi paul na popaia long bungim Jisas long Santu Misa.

Taim yumi bung long Eukaris, yumi bung olsem ol pipel i mekim bikpela pati.

Long Eukarisio yumi kamap wanpela lain. Yumi save beten na singsing long onaim (Papa) God bilong yumi. Yumi harim gut Tok bilong God na yumi kisim strong insait long Kristen laip na bilip bilong yumi.

Tru tumas, God i bin givim laip i mas kamap strong insait long yumi na yumi mas wok hat moa long kamap gutpela Kristen long olgeta de.

Yumi mas save, bodi na blut bilong Krai yumi kaikai i helpim yumi long kamap moa klostu na i stap pas wantaim em. Em min olsem Krai i stap insait long yumi na yumi i stap insait long em.

Olsem na sapos yumi glasim gut, Krai i kam long em yet na strongim yumi olsem gutpela kaikai i save strongim yumi long olgeta de.

Long Santu Eukaris yumi bung tru,tru wantaim Krai. Prea wantaim em, wok wantaim em, tingting olsem em na skelim pasin olsem em i bin mekim.

Tru, olgeta taim yumi bungim Krai na kisim Krai, yumi kamap moa klostu long em na yumi kamap moa klostu long olgeta pipel bilong God.

Olsem em i stiaim yumi long kamap wanpela lain. Tru tumas, Jisas em yet i givim yumi na long pat bilong yumi, yumi mas oltaim kisim dispela santu kaikai, em Bodi na Blut Jisas Krai na i stap gut oltaim.

**TAIM kantri i wok long bungim hevi long bikpela sans i bagarapim ples, ol gaden kaikai na wara i sot, em i taim bilong yumi olgeta tu long yusim pasin bilong yumi ol Melanesia long serim samting, lukautim lain i kisim bagarap no gat haus ,sariti, tok tru na jastis, Bisop Arnold Orowae, em Presiden bilong Konpres bilong ol Katolik Bisop long PNG na Solomon Ailan, i tok.**

Em i tok yumi no ken yusim dispela taim long benefit o kisim gutpela samting long ol lain i stap long hevi, tasol em i sans bilong yumi long helpim ol lain i stap long wari na hevi.

"Planti hap bilong PNG i bungim bikpela san na ais i pundaun long ol narapela hap. Wara i sot na long planti, kaikai tu i wok long sot.

"Dispela i taim bilong yumi long lukluk na bihainim pasin Melanesia yumi gat long helpim ol lain i stap long hevi, na serim ol samting wantaim ol," Bisop Orowae i tok.

Em i skruim tok i go moa olsem, "ol wara i gat wara i kam olsem ren long heven i stap. Dispela wara i bilong olgeta. Na i rong long sampela man i sasim



**Bisop Arnold Orowae, Presiden bilong CBC long PNG na Solomon Ailan.**

mani long ol narapela i no gat wara na ol i bungim hevi long sot long wara. Wara long ol riva i bilong olgeta lain long yusim fri," Bisop Orowae i tok.

"Long wankain taim, em i no taim bilong ol lain i no bungim hevi long taim bilong bikpela san na drai long sasim bikpela mani na mekim bikpela profit long ol gaden kaikai. Na em i no stret long long wokim no gut long ol

lain husat i no gat haus bikos long hevi na ol i painim ples long stap long en. Pasin long mekim profit o winmani long yusim taim bilong hevi na bagarap i no stret, na i no gutpela," Bisop Orowae i tok.

Em i tok taim yumi selebretim 40 krismas bihain long kantri i kamap independens, em i taim long soim olsem yumi ken mekim samting long helpim wanpela narapela.

Em i tok olsem ol pipel bilong Israel i bin raun long ples wesana nating (desert) long 40 krismas, yumi trastim Bikpela long oltaim lukautim pipel bilong

em, na tu, long Jisas husat i soim yumi olsem em i ken tanim liklik samting i go planti long helpim olgeta, yumi ken mekim na serim.

"Kantri bilong yumi i gat bikpela graun long olgeta i serim ol samting long en. Yumi no inap stap tarangu. Pastaim yumi tingim ol stua kaikai i kam long ol arapela kantri, i moa beta yumi lukluk long hamas yumi gat i stap

yet long ol eria we hevi i no painim ol yet, moa yet long ol gaden kaikai.

"Yumi ken yusim disasta mani long baim ol gaden kaikai na kumu long ol neiba na trenspotim i go long ol lain i sot long kaikai samting. Dispela i moabeta long wet i stap long rais na nudels," Bisop Orowae i tok.

Em i tok yumi mas toksave long pipel long no ken wokim paia nating bikos em bai kamapim bikpela birua mao long dispela taim bilong bikpela san. Tu, sapos yumi laitim paia nating nating na yumi no kontrolim, em bai bagarapim ol haus, pipel na ol bus na diwai bilong yumi.

Em i tok nau yet tu, ol bus, diwai na ol animel na pisin i save stap long bus i wok long bungim hevi long bikpela san.

"Yumi pre long Bikpela husat i bos long olgeta samting long heven na graun long pinisim dispela bikpela san na ais na wantaim helpim bilong em, bai yumi kisim strong long luksave long ol gutpela samting yumi ken mekim, helpim na searim ol samting wantaim ol narapela i stap long hevi na bagarap," Bisop Orowae i tok.

## Samo Yunaitet Sios seket i selebretim 140 anivesari

### Tony Sapan i raitim

SAMO Yunaitet Sios Seket long Nu Ailan Provins i bin holim kwaia de long las Sande, Ogas 15, long makim 140 yia sios i bin kamap long hap na i wok i kam i nap nau.

Reveren George Brown em dispela man husat i bin kisim Gutnius i go long NGI rijon na kantri long yia 1875.

Mak bilong 16 kwaia grup i bin stap insait long kwaia resis

Em i namba wan taim bilong sios long luksave long kamap bilong Yunaitet Sios long Niugini Ailan rijon we Reveren George Brown, i bin kisim Tok bilong Bikpela i go long hapsait.

Samo seket i luksave olsem sios i bin kam wantaim pawa bilong musik na Gutnius long soim

strepela rot na stia long laip i go long ol pipel.

"Sios i bin km wantaim pawa bilong musik we ol lain i bringim Gutnius i soim wanem ol i gat long laip bilong ol," Reveren Eremas Tuanamami, em memba bilong komiti i redim dispela bung, wantaim Elias Dickson, em wanpela tisa bilong singsing kwaia i bin kamap long las Sarere.

Memba bilong Wod 8, Stanley Tunut, we i karamapim Samo na Sianus viles sampela ol kwaia lain i kam long ol i tok dispela bung i soim luksave olsem i gat nid long helpim sios long kari-maut gut wok bilong em.

Mist Tunut i tok em i soim olsem tu ol lotu manmeri na ol lida i wok wantaim long gutpela bilong olgeta, na em i bin tok amamas long dispela.

## Abel: Mekim eksen stret

### Aja Potabe i raitim

NAU em i taim bilong mekim eksen stret na i no taim bilong mekim planti toktok na kamapim kainkain nupela loa na polisi.

Minista bilong Nesanel Plening Charles Abel i tokim ol manmeri husat i kam long Waigani Semina aste monin olsem yumi manmeri PNG i save mekim planti maus wara toktok na emпти promis tasol yumi no save bihainim olgeta toktok.

Abel i mekim dispela toktok bikos em i laikim ol wok manmeri long wanwan wokples long mekim wok stret long larim PNG i bihainim Visen 2050 long kamap welti na helti nesen.

Dispela toktok bilong Minista i salensim gavman tu

long yusim mani gut na stopim paul pasin na pasin korapsen.

"I gat bikpela spes i stap namel long ol toktok bilong yumi na eksen bilong yumi. i no ol lida tasol. Planti manmeri PNG i save opim maus na toktok tasol ol i no save mekim eksen stret," Abel i tok.

Wanpela tok piksa Abel i yusim em pasin Kristen. Em i tok planti bilong yumi save tok mipela Kristen tasol planti taim yumi no save bihainim tok tru i stap long Buk Baibel. "Long maus tasol yumi Kristen. Long eksen yumi no luk olsem Kristen. Yumi save bikmaus na apim nem bilong kantri tu olsem PNG em i Kristen kantri.

Tasol pasin korapsen i stap yuget, yumi giaman long Palamen, ol man i kilim ol yet i go

i kam, raskol pasin stap yet...yumi yusim nem bilong God nating," Abel i tok.

Em i tok wankain olsem tasol, gavman i save kamapim planti plen na polisi long kirapim kantri. Maski gavman i yusim bikpela mani stret long haiaim ol konsalten na saveman long raitim nupela plen na polisi, samting tru i no save karim kaikai bikos ol wokman i no save mekim eksen.

"Plen na polisi em i pepa natin. Em i wankain olsem yumi save opim maus na tok-tok. Tasol sapos yumi bihainim dispela plen na polisi na mekim samting stret, yes, em ba inap long karim kaikai."

"Mani em i wanpela samting we em bai larim ol dispela plen i wok tru.



Dispela em wanpela kwaia grup bilong Is Nu Briten provins. Kwaia singsing em i save kamap strong long Is Nu Briten na Nu Ailan. Foto: Nicky Bernard



# Taim bilong bikpela hevi i taim bilong skelim gut mani bilong kantri



**BIKPELA** hevi tru i kamap nau long kantri. Taim bikpela san i mekim na ol kaikai long gaden i bagarap na wara i sot. Ol pipel long ples long Enga, Sauten Hailans na Westen Hailans i kisim taim. Bikpela kol na ais i bagarapim ol gaden kaikai bilong ol. Wara i sot long hap bilong Simbu bikos long bikpela san. Ol skul pikinini i kisim taim tu bikos i no gat wara na ol i mas skul hap taim tasol o long sampela hap, ol skul i pas.

Dispela hevi bilong bikpela san we no gat ren i pundaun longpela taim kamap long olgeta bilong kantri. Long ol ples nambism ol pipel i painim taim nau bikos ren i no pundaun na wara saplai i go daun. Ol kaikai long gaden tu i no gro gut.

Nesanel gavman i kamapim bikpela tok save i go long ol pipel long was gut long wara bikos ol saveman i tok bai i no gat ren inap 4-pela mun samting. Tasol long ol ples long Hailans we ais no bikpela kol i bagarapim ol gaden kaikai, bai ol pipel i kisim bikpela hevi moa. Bai ol i hatwok long painim ol nupela sid na kru bilong ol kaikai long planim gen. Sampela i tok bai i longpela taim moa long ol pipel i ken kisim kaikai bilong gaden sapos ol i wokim ol nupela gaden.

Gavman i skelim K5 milien long helpim ol pipel husat i kisim bikpela bagarap moa. Bai ol i kisim kaikai saplai bilong stua long lukautim ol. Tasol gavman i tok i mas gat ripot i kam long ol distrik we dispela bagarap i kamap. Na ol opisa bilong gavman yet bai raun go lukim na skelim na givim ripot long gavman.

Dispela i gutpela rot long lukim olsem pablik mani i go stret long helpim ol pipel husat i nidim tru helpim. Yumi save olsem long kain taim olsem bai ol kon lain tu i giaman long paulim ol kaikai samting gavman i givim long helpim ol pipel. Olsem na i mas rot bilong sekap na lukim olsem kaikai i go stret long helpim pipel.

Long kain taim ol tu, yumi lukim ples klia olsem PNG i no redi long kain bikpela bagarap olsem i kamap. Long las yia yet ol saveman bilong glasim ren na win na klaut i bin tokaut olsem dispela taim bilong bikpela taim bilong san ol i kolim El Nino bai kamap.

Sampela hap long wok i redi long bungim kain taim olsem na ol i no kisim bikpela hevi tumas.

Ol liklik kantri olsem PNG i no ting bai bikpela hevi tumas i kamap olsem na gavman i no bisi tumas long ol dispela tok lukaut bilong ol saintis. Yumi pilim dispela hevi nau.

Ol fama long Hailans husat i groim kaikai long salim long ol hotel na maket long Lae na Mosbi i kisim bikpela taim nau bikos ais i bagarapim kaikai long gaden bilong ol. Planti bilong ol i kisim dinau long beng long wokim bisnis bilong groim ol kaikai.

Ol fama i mas gat gutpela helpim long ol saveman bilong groim kaikai long givim gutpela skul long ol. I luk olsem ol fres kaikai bilong kol ples yumi kisim long Hailans bai i sot nau.

Na plen bilong Egrikalsa Minista long stopim ol ovasis fres kaikai bai i mas wet inap neks yia samting.

Dispela bikpela hevi i mas mekim yumi skelim gen pasin bi-



Jada 0151

long yusim pablik mani bilong kantri. I gat toktok i kamap olsem kantri bai sot long mani. Nau yumi bungim dispela hevi, ating i gutpela long katim bek sampela aidia bilong gavman long spendim

bikpela mani we i no helpim laip bilong ol pipel i mas stop. Long las sikispela mun, yumi luksim bikpela mani i go long sanapim ol haus na rot na ples bilong pilai na long tupela bikpela siti bilong kantri. I no

gat tok long dispela, bikos ol dispela wok i helpim ikononi bilong kantri. Tasol nau em i taim bilong kantri i bungim hevi, na ol pipel i nidim helpim. Olsem na yumi skelim gut mani long helpim ol pipel.

## Long lukim kwaliti edukesen gavman mas kamapim/trenim moa klasrum/tisa

WANTAIM ol polisi em i kamapim, gavman i tok long kamapim kwaliti edukesen.

Dispela i min olsem ol pikinini i mas lain gut, rit na rait gut na kamapim ol samting.

Em i gutpela tok na sapot i mas stap long kain tok.

Kamapim kwaliti edukesen i bikpela hettok tu taim ol hetman bilong Edukesen Dipatmen i bin bung long bikpela kibung bilong ol long Lae, Morobe provins long Jun dispela yia.

Minista bilong Edukesen, Nick Kuman, long taim em i opim kibung i tok kantri i mas gat ol manmeri we ol i save long rit na rait, gat save bilong mekim wok, i wok tru na i pas tru long wok bilong ol.

Na em i singaut long olgeta opisa, ogenaisesen na manmeri husat i pas long wok bilong edukesen long wok bung wantaim long lukim kaikai bilong dispela toktok.

Gutpela long i gat kain tok tasol i gat ol hevi pas bipo long kain tok i kamap na karim kaikai.



Dispela ol hevi em olsem gavman i mas mekim moa klasrum, trenim moa tisa, moa haus tisa na samting bilong ol sumatin long yusim long lain gut.

Bikos long fri edukesen polisi, dispela i lukim moa ol pikinini i rejista long go skul na i no gat inap klasrum long inapim namba bilong ol pikinini i kamap long skul.

Na moa ol pikinini i stap long wanwan ol klas, i winim namba em Dipatmen i makim long i mas gat.

Dipatmen bilong Edukesen i makim 40 sumatin long wanpela tisa, tasol dispela i abrusim mak i go antap long 70 na 80 long wanpela tisa. Dispela i no gutpela mak long

ol pikinini i lain gut.

Spes bilong wanpela klasrum i no inap long kisim kain namba. Moa long dispela, wanpela tisa i no inap long i gat taim long lukim gut wok bilong ol sumatin, i skulim ol na skelim husat i lain gut na husat i nidim moa taim long em i mas stap wantaim na helpim em.

Long wanpela skul long Pot Mosbi, ol sumatin na tisa i bungim hevi bilong pikinini i no lain gut, airaun na sik na i no go long skul long sampela taim.

Na long narapela skul, sampela tisa i no go yet long trenim long skulim ol mangi long lain gut bihainim standet bes edukesen (SBE). Ol i mas kisim dispela trenim long stat bilong yia tasol i wet yet.

Wantaim long bikpela namba bilong ol sumatin, sot hevi bilong sot bilong risos buk bilong ol tisa na sumatin long yusim.

Dispela ol samting em gavman i no givim yet.

Edukesen Minista wantaim

Dipatmen Sekretari i tok gavman i bin makim pinis K267 milien olsem skul infrastrukta fan.

Dispela i narapela fan long tuition fi fri (TFF) mani Dipatmen i gat long em.

Dispela mani i kamap long 2015 Mani Plen tasol inap nau, dispela mani i no go aut long ol skul.

I gat save olsem dispela mani i stap wantaim Nesanel Plening Dipatmen olsem developmen mani.

Dipatmen i holim dispela man bikos Edukesen Dipatmen i tok i gat hevi bilong kisim gut ripot bilong wanwan ol skul yet olsem hamas pikinini, klasrum, tisa na haus tisa i stap long wanwan ol skul na hamas moa ol i mas i gat.

Inap long dispela ripot o data i kamap, Dipatmen i tok em i no inap long lusim dispela mani.

Kain ol hevi i stap yet bipo long Dipatmen i ken lukim ol sumatin i lain gut, gat gutpela save, i honest, i wok tru na i pas long wok bilong ol.



Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Published at  
Able Building  
Complex,  
Sec 58 Lot 02,  
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



# Gavman kirapim faivpela ki eria

## Aja Potabe i raitim

### DEPUTI Praim Minista Leo Dion i tok gavman i wok hat long kirapim faivpela ki eria bilong developmen bilong dispela kantri.

Mista Dion i tok dispela faivpela ki eria we gavman i lukluk long en em ol edukesen, helt, rot na bris, bisnis na ikonomi, na lo na oda.

Em i tok taim ol i kamapim O'Neill-Dion gavman bihain long 2012 nesanel ileksen, ol i bin sainim wanpela agrimen ol i kolim Alotau Akod.

"Planti gupela samting gavman i mekim long kirapim dispela kantri em i olgeta samting mipela i bin wanbel wantaim na sainim long Alotau Akod taim mipela i bin kamapim dispela gavman bihain

long 2012 nesanel ileksen," Mista Dion i tok.

Em i tok dispela i soim olsem gavman i lukluk i kam klostu stret long ol bikpela nid kantri na pipel i gat.

"Mipela i bihainim midium tem divepmen strateji. Mipela i givim namba wan luksave long ol dispela eria bilong developmen bikos ol dispela faivpela samting em i namba wan samting long senisim laip bilong pipel bilong dispela kantri," Mista Dion i tok.

Dion i tok bipo planti gavman i bin kamapim planti ol gutpela plen, polisi na loa.

"Tasol ol i bin bihainim ol dispela plen na polisi tu o nogat? Sapos wanpela man i lukluk i go bek long dispela tri yias, O'Neill-Dion gav-

man i bihainim dispela Alotau Akod na givim sevis long pipel. Em i no hait samting."

"Yumi olgeta lukim pinis. Planti nupela rot na bris i kamap long olgeta hap bilong PNG. Lo na oda asua i wok long go daun. Fri edukesen na fri helt sevis i stap pinis," Dion i tok.

Dion i bin mekim dispela toktok taim em i bin opim Waigani Semina long Yunivesiti ov Papua Niugini (UPNG) asde moning.

Planti ol saveman, bisnis manmeri, yunivesiti sumatin na ol gavman wokman i bin harim dispela semina. As bilong dispela bung em bilong kisim tingting long ol wan wan manmeri husat i bin toktok long kirapim dispela kantri aninit long PNG Visen 2050.

# Gavman bai givim K5 milien disasta mani

## Paul Zuvani i raitim

GAVMAN bai givim K5 milien disasta mani long Nesanel Disasta Senta.

Dispela mani i bilong helpim ol lain husat i bungim hevi bihain long bikpela kol i bagarapim gaden kaikai long ol ples long sampela Hailans provins.

Sif Seketeri bilong Gavman Sir Manasupe Zurenuoc i tok nau yet opis bilong em i kisim ripot tasol long Imbongu na lalibu Pangia distrik long Sauten Hailans, Kandep long Enga Provins, Tambul Nebilyer long Westen Hailans na Kundiawa Gembogl long Simbu provins long bagarap i kamap.

Sapos toktok i kamap long ol hevi i kamap long ol arapela hap bilong dispel kantri, opis na komiti bilong em i wet long kisim dispel ol

ripot na givim helpim.

Dairekta bilong Nesanel Disasta Senta Martin Mose i tok opis bilong em i mekim askim i go long Deputi Praim Minista na Minista bilong Intagavman Rilesen Leo Dion sapos Nesanel Eksekutiv Kaunsil i ken bung na tokorait long lusim K5 milien long was na givim helpim long hevi bilong san.

Na dispel helpim mani i kam bihain long kibung i kamap namel long ol bikpela opis olsem Nesanel Weda Sevis, Nesanel Disasta Senta, Intagavman Rilesens, Sif Seketeri, Nesanel Egrikalsa Risets Institut na Difens Fos long kamap wantaim plen long helpim ol manmeri i bungim hevi.

Dispela grup i tok ol i askim wan wan ol provins long salim ripot long hap bilong ol bai komiti i ken save hamas helpim long kain helpim

komiti mas givim.

Long wankain taim komiti i askim gavman long givim K200,000 long Disasta Senta bai ol disasta opisa i go aut long ol provins na kisim ripot bilong ol yet long hevi i kamap.

Komiti i tok taim Senta i kisim mani em bai givim mani i go stret long ol saplaia husat i givim sevis na i no go long ol provinsal gavman opis.

Em i laikim olgeta mani we ol i givim i mas go stret long ol sevis kampani o grup na i no lus nating long ol provinsal opis.

Gavman na ol saveman i tok lukluk bilong dispel strongpela san ol i kolim El Nino i stat tasol bilong moa de na mun long kam na gavman yet wantaim ol manmeri i mas kamap wantaim plen na luksave long ol rot long abrusim ol

# Ipatas i tok ol skul long Enga bai kisim wara na kaikai saplai

## Stanley Nondol I raitim

GAVANA bilong Enga Peter Ipatas i tok bikpela taim bilong san i kamp long Hailans na ais i pundaun long Enga provins na bagarapim ol gaden kaikai em wanpela bikpela hevi long histori bilong kantri. Na em i singaut long olgeta lida long provins na distrik i mas wok bung, kamapim gutpela plen long helpim ol pipel.

Ais i pundaun long ol 6-pela distrik bilong Enga na bagarapim ol gaden kaikai. Wankain hevi i kamap tu long Westen Hailans, Simbu na ol arapela distrik long ol Hailans provins.

Mista Ipatas i tok ples i drai long dispela yia em bikpela moa na winim bikpela hevi bilong san i bin kamap long 1972 na 1997. Em i tok bai ol pipel i kisim taim long go bek long nomol laip bikos ol kaikai na arapela samting bai i no inap long gro gut inap 2 o 3

yia bihain.

Mista Ipatas i tok em i wari tru long ol skul pikinini. Em i tok provinsal gavman wantaim ol lida bilong provins bai wok hat long givim wara na kaikai saplai long ol skul pikinini long ol bai go het na skul na pinisim 2015 skul yia.

Em i tok moa long 300,00 pipel bilong Enga bai kisim baragap longpela taim na ol lida bilong provins i mas wokbung, plen gut na yusim ol risos i kam long gavman na dona long gutpela rot long helpim ol pipel kisim bagarap long dispela taim.

Gavana Ipatas i tok provinsal gavman bai helpim ol pipel tasol em i no tok klia long hamas mani bai ol i yusim bikos em i tok kantri i bungim bikpela hevi bilong mani na provins bilong em i no kisim inap Provinsal Sapot mani o PSIP mani bilong 2015.

Sampela distrik long provins olsem Kandep na Wabag i kisim tok save olsem memba bi-

long ol bai givim kaikai saplai. Tasol Mista Ipatas i tok hevi i kamap long olgeta distrik na ol, lida i mas wokbung na kamapim gutpela plen long yusim pablik mani.

Bikpela gol main long Porgera i bungim hevi bilong wara i sot, wankain olsem Ok Tedi maining na i ken pasim wok sapos wara level i go daun moa.

Long wankain taim Simbu provins i tokaut olsem provins i sot long wara na planti ol pablik long Kundiawa taun i go kisim wara long wara Simbu.

Provinsal edministreta, Joe Kunda i tok provins i bungim hevi longpela taim na em i salim ripot i go long gavman tasol em i no kisim wanpela bekim long ol helpim ol i askim long en.

Long Sauten Hailans, Westen Hailans, Jiwaka na Hela i bungim wankain hevi bilong san na i stap long bikpela was na i wari long bungim wankain hevi bilong ais i bagarapim ples.

# Rijon luksave long PNG

## Aja Potabe i raitim

ESIA-PASIFIK rijon na wol i nau luksave long Papua Niugin pinis bikos ol lida bilong yumi aninit long

O'Neill-Dion gavman i wok long apim nem bilong dispela kantri.

Deputi Praim Minista Leo Dion i mekim dispela toktok taim em i makim maus bilong Praim Minista Peter O'Neill na opim Waigani Semina long Yunivesiti ov Papua Niugini (UPNG) asde moning.

Mista Dion i tok PNG i mas sanap strong long ai bilong ol arapela kantri insait long Esia-Pasifik rijon na long wol tu wantaim bikos kantri bilong yumi i nidim sapot bilong arapela kantri.

"Ol arapela kantri long Esia-Pasifik rijon i luksave pinis long PNG. Planti ol ofisal stet visit bilong ol lida bilong Tailan, Indonesia, Japan, Australia na arapela kantri i soim olsem PNG i sanap long rijon olsem wanpela bikpela kantri tu," Mista Dion i tok.

Em i tok planti kantri i wok long putim ai long PNG bikos O'Neill-Dion gavman i wok long promotim invesmen na treid wantaim ol poroman kantri bilong yumi.

"PNG i stap long ai bilong ol kantri long Esia na Pasifik. Mi amamas olsem Praim Minista Peter O'Neill i stap nau long India. Em i kisim ol PNG bisnis manmeri i go long wanpela bikpela bung we bai kamap namel long ol bisnis manmeri bilong PNG na India," Mista Dion i tok.

Em i tok PNG i hostim pinis naispela na gutpela XV Pasifik Gems we planti ol opisal na pilaia bilong ol liklik Pasifik Ailan kantri i bin amamas stret long en.



1. BES DRAM: Wanpela sumatin bilong DBTI i paitim 44 galon dram olsem bes dram bilong bras ben bilong long liklik kalsa so bilong skul long las wik.

2. HEPI BON DE: Wanpela wok meri bilong Womens Micro Benk i katim kek long makim wan yia bon de bilong ol.

Oi Poto: Nicky Bernard.



# Mosbi siti wok long gro yet

## Yumi lukautim na helpim siti bilong yumi long senis

Ol liklik bot i pulap long Royal Papua Yot Klapa



Wanpela yangpela meri Papua i bilas long Hiri Moale festival

Nesanel Palamen em i wanpela stailpela bilding insait long Mosbi Siti we planti ol nupela manmeri na ol visita i save laik long go lukim na kisim piksa.



### Aja Potabe i raitim

**KEPITAL siti bilong Papua Niugini i wok long gro i go bikpela na klostu en i bai kamap wanpela metropolitan siti insait long Asia-Pasifik rijon.**

Pot Mosbi i bin lukim planti gutpela divelopmen i kamap insait long faivpela yia tasol. Na planti ol arapela gutpela samting tu i wok long kamap.

Gavman i putim moa mani long ol rot bilong Mosbi siti. Mosbi i nau gat nupela Kumul Flai Ova bris long Erima. Dispela Flai Ova bris i senisim pes bilong Erima, we bipo ol manmeri i save salim buai na smok na bagarapim pes bilong siti.

Planti nupela haus na i kamap na senisim pes bilong siti. Ol kar i pulap tru long olgeta hap bilong siti. Populesen bilong manmeri long Mosbi i wok long groa go bikpela.

Dispela em i no nogut. Em i soim gutpela sain o mak olsem kapital siti bilong yumi i wok long groa i go bikpela nau.

Planti bikpela intenesenel kibung i wok long kamap long siti bilong yumi. Dispela i soim olsem Pot Mosbi i wok long senis hariap tru.

Tasol pasin bilong sampela manmeri i no senis. Sampela manmeri i wok long salim buai long strit na long ol pablik ples. Dispela i wok long bagarapim pes bilong Mosbi.

Planti ol manmeri i wok long dring bia na brukim botol nating nating na mekim nabaut long strit. Dispela kain pasin i mas stop.

NCD Gavana Powes Parkop i tok dispela siti em i olsem bikpela ples o kapital siti bilong Papua Niugini.

"Kepital siti bilong yumi i wok long groa. Na mi laik ol manmeri tu i groim gutpela pasin poroman na yusim het gut long no ken kamapim birua na hevi insait long Mosbi," Mista Parkop i tok.

Wanpela ripot bilong Nesanel Risets Institut (NRI) i tok ol haus na bilding long Pot Mosbi i senis hariap tru.

Dispela ripot bilong propeti na haus i painimaut olsem planti manmeri i wok long baim graun na sanapim ol stail moden haus, i no olsem ol kolonial stail haus bilong bipo.

Dispela ripot i tok planti ol nupela na longpela stori bilding tu i wok long kamap insait long Mosbi.

Tru tumas, sapos yu raun long siti, bai yu lukim planti nupela bilding i kirap. Long taun na Waigani eria, planti nupela stail haus i wok long kirap hariap tru.

Ren tri hotel, Painapel Bilding, Lamana na Visen Siti em ol sampela nupela bikpela haus we i kamap long siti bilong yumi.

Ol dispela bikpela bilding i wok long senisim pes bilong Mosbi. Dispela em i gutpela divelopmen we em i ken kamapim planti wok mani na manmeri i ken kisim benefit.

Ol manmeri tu i wok long baim graun long sanapim haus. Taurama veli em i pulap long ol nupela haus nau.

Gavana Parkop i tok ol man i baim pinis planti graun long 14-Mail na i go antap olsem long Sogeri rot. Dispela i soim olsem Mosbi i gro nau.

Bos bilong polis long Mosbi Met Sup Andy Bawa i tok planti raskol pasin long Mosbi i stop.

"Kraim reit i wok long go daun," Bawa i tok.

Poreprena Friwe tasol i bin wanpela bikpela rot tasol long Mosbi. Ol liklik hanrot nabaut i bin pulap long ol hul na pipia. Sampela ol liklik hanrot o strit rot i bin bagarap stret.

Tasol NCD na nesanel gavman i mekim gutpela wok stret long stretim ol rot insait long Mosbi.

Praim Minista Peter O'Neill i tok gavman i gat bikpela tingting long kirapim dispela siti na statim wanpela nupela rot stap long 9-Mail na kam olsem long 8-Mail na Gerehu na bai pinis long Baruni na long taun.

I no long taim, ol bai ol i opim dispela rot. Olgeta ples stap insait long dispela rot bai kamap olsem ol eben sabeb.

Tude, 9-Mail - Erima rot i save pulap long kar na sais bilong rot i liklik tumas. Tasol nau dispela rot i kamap wanpela gutpela rot na trefik i ran gut.

Bipo long Pasifik Gems i kamap, nupela flai ova bris na rot i bin kamap long Jacksens ples balus i kam long Waigani opis.

Mista O'Neill i tok gavman i stretim planti ol liklik rot na strit insait long Mosbi. Dispela em i tru bikos nau yumi i ken lukim ol konstraksen kampani i kamapim nupela rot long 2-Mail na long taun. Ol rot long Waigani na Morata i wok stap.

Ol ples bilong pilai na spot fesiliti long Mosbi i stap gut bihain long gavman i yusim moa long K90 milen long kirapim ol nupela samting bilong XV Pasifik Gems.

Spot Minista Justin Tkatchenko i tok olgeta dispela spoting fesiliti i stap gut tasol yumi no save sapos ol manmeri bai lukautim gut o nogat.

Bihain long XV Pasifik Gems bai FIFA Anda 20 Wimens Wol Kap i kamap long Mosbi long Novemba neks yia. Bikpela APEC miting bai kamap long yia 2018. Gavman i tingting tu long bid long 2026 Komonwelt Gems.

"Dispela em ol planti gutpela samting wok long kamap long kantri bilong yumi," Mista O'Neill i tok.

Nesanel Trening Kaunsil i tok planti nupela skul i wok long kamap long Mosbi. Planti ol yangpela manmeri i wok long kam long Mosbi long skul na kisim save. Dispela ol nupela skul i wok long helpim ol yangpela manmeri bilong dispela kantri long kisim save na statim gutpela sindaun long bihain taim.

Praim Minista Peter O'Neill i bin amamas long gutpela pasin poroman ol manmeri bilong Mosbi i bin soim long ol arapela Pasifik Ailan manmeri long taim bilong Pasifik Gems.

"Dispela kain pasin poroman na pasin bilong mekim gutpela samting bai helpim yumi olgeta na senisim dispela kantri," O'Neill i tok.

Gavana Parkop i tok dispela siti em i nam-bawan ples bilong yumi ol manmeri PNG.

"Yumi mas lukautim Mosbi. Larim ol arapela manmeri i amamas long kam lukim siti bilong yumi. Gutpela pasin bilong yumi wan wan bai helpim dispela siti long kamap wanpela poroman siti insait long wol," Mista Parkop i tok.

Taim siti i wok long gro, yumi ol pipel tu i mas groim gutpela pasin na skelim gut ol samting yumi mekim long no ken daunim groa bilong Pot Mosbi.



Taim yu sanap long Yuni Hil na lukluk i go daun long Papa Lealea sait, bai yu lukim dispela sanset taim san i silip sore.



# Stori bilong tumbuna

## Man i kamap Pik

**B**IPO tru i gat tupela brata i stap. Nem bilong tupela em Mond na Gand.

Mond em i bikpela brata na Gand em i liklik brata. Tupela i save stap long ples bilong tupela ol i kolim Wom-Kama, long Gembogl, Simbu. Tupela i save wantaim ol lain bilong tupela em ol kolim Kuglkane klen.

Ol stap i go na wanpela taim, ol Kuglkane klen o hauslain i bung na paitim toktok i go na ol pasim tok long bung long haus bung (bugla-yung).

Orait olgeta lain I go insait long wok haus bilong kilim pik. Na tupela brata, Mond na Gand tu i wokim haus. Taim ol i pinisim haus, ol i stat long painim ol bilas bilong singsing.

Nau ol i singsing i stap na ol i salim tok long sampela lain i stap klostu olsem, Kengalku, Kalaku, Denglaku, Gira-tamagle long ol tu i kam singsing long haus pik bilong ol. Tasol turangu ol lain bilong Mond na Gand i wok long tok baksait long tupela na tok Mond na Gand tupela i no gat meritu na tupela i nogat pik.

Olsem wanem na tupela i wokim haus na joinim yumi long singsing na stap. Sori tupela brata i pilim nogut tru na tupela i toktok long tupela yet olsem tumora, ol bai bilas gut tru na go long bik bus.

Tupela i slip na long moning tupela i go long bus. Gand i tokim Mond long givim baksait long em. Taim em i givim baksait, Gand i lusim olgeta bilas bilong em na kamap pik na digim graun.

Taim Mond i tanim na lukim brata bilong em, em i lukim pik ya!

Brata i wari tru, tasol em i no olsem pik. Olsem na Mond I tok, "brata yu kamap

pik tasol em i no stret. Yu liklik bilong mi ya na yu wet pastaim. Mi bikpela bilong yu bai mi traim."

Nau Gand i kam bek nomol na givim baksait long Mond.

Mond i lusim bilas na tanim kamap na taim Gand i lukim em orait. Nogat mak em kamap pik stret. Taim tupela i mekim olsem, raun long bus ol lain bilong tupela i stat long kilim pik.

Turangu Gand i pasim pik bilong em. Em brata i kamap pik ya em kam long ples Wom-Kama. Taim tupela i raun long bus, Mond i tokim Gand olsem, "taim yu laik kilim mi, yu no ken katim diwai stik na kilim mi. Sapos nogat, yu mas katim banana yu yusim olsem stik i go na paitim isi tru long mi."

Brata Gand i mekim olsem Mond i tok long em.

Long taim ol man i lainim pik bilong ol i lukim pik bilong Gand i winim pik bilong olgeta man. Gand i kukim pik bilong em na katim na skelim na i givim long ol man, pren, susa, anke na kandre na amamas wantaim ol lain bilong em.

Nau long Wom-Kama ples, na long Simbu tu, ol i save tok pik em i brata bilong ol na ol i no save lusim pik.

Na ol lapun papa-mama i save stori long ol pikinini na ol pikinini tu i save gut tru long stori. Na ol i holim pik strong tru, bikos man i kamap pik na i go aut long ol narapela ples.

Wanem hap ples nau yu holim pik, dispela pik i kamap long ples, Wom-Kama, Mond na Gand i kamap pik na nau yumi i gat pik. Dispela em trupela stori tumbuna na planti hap long ples ol i save long dispela stori bilong Mond na Gand.

### TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: [editorial@wantok.com.pg](mailto:editorial@wantok.com.pg)  
Telepon namba: 3252500.

Tenkyu

## Raun wantaim Wantok kru ...

# Demas Saul autim nupela singsing long Kokopo

Nicky Bernard i raitim

**TOP MUSIK man bilong Madang Demas Saul i autim nupela albam wantaim planti long ol gutpela na naispela singsing insait long en.**

Demas i bin raun go long Kokopo long tupela wiken go pinis long autim nupela singsing bilong em we em raitim na i wok long kamap strong long ol redio stesin insait long kanti.

Planti manmeri husat save bihainim musik bilong Demas long Is Nu Briten bin go pulap long Gasel Intanesenel Hotel long Kokopo long harim singsing long wanpela nait so bilong em.

Demas Saul i save mekim singsing bilong em na musik i kamap gut tru we i save pulim lewa bilong planti manmeri na pikinini. Em save raitim singsing bilong em long pasin yumi Papau Niugini save mekim long laip

stail bilong yumi long ples.

Planti bilong ol olupela singsing bilong em i stap yet long ol redio stesin na ol dispela singsing save pulim tingting bilong ol manmeri long siti long tingim bek ples ol kam long en.

Demas i wok long mekim ol liklik raun bilong em long wan wan provins long promotim dispela nupela albam bilong em.



Demas Saul i sanap wantaim Polis Komanda bilong Is Nu Briten Tony Wagambie Junia long Kalabon pilai graun long Kokopo. Poto Nicky Bernard

## Sel mani i strong yet long ol Tolai

Nicky Bernard i raitim

SEL MANI em bikpela samting tru long ol pipel bilong Is Nu Briten Provins. Planti ol samting long maket ol save baim long sel mani na dispela i wok long strong yet i stap.

Sel mani tu ol save baim meri na mekim planti ol kastam wok, kina na toea long bipo ol manmeri long Is Nu Briten i no save bisi tumas long en, sel mani em karamapim kina na toea.

Dispela yia bai yumi kisim 40 yia bilong Indipenden bilong yumi, na planti senis i wok long kamap long kantri bilong yumi na wan wan provins.

Is Nu Briten tu i wok long senis bihain long maunten paia i bin bagarap bikpela taun bilong ol long Rabaul na ol muv go long Kokopo. Na Kokopo taun i gro go bikpela hariap tru tasol bikpela samting ol i no lusim kastom pasin bilong ol wantaim tambu o sel mani.

Wan wan famili na klen i mas gat sel mani long haus bilong ol. Taim narapela klen i mekim kastom wok ol narapela klen bai kisim sel mani bilong ol kam aut na kautim long mita na dispela mita bai soim hamas kina na toea inap long dispela mita.

Olsem na dispela sel mani i save stap long tingting bilong olgeta pikinini Tolai inap ol kamap bikpela manmeri. Na ol save gut tru long wei bilong kauntim na wei bilong tilim long ol klen bilong ol.



Tupela mama i soim sel mani ol raunim na karamapim wantaim lip bilong marita. Dispela ol sel mani ol givim go long East Tiger, Hunters, PNGNRL na ol referi long taim Hunters i mekim las pilai bilong em long Kalabon. Poto Nicky Bernard



Em nau! Ol pikinini i ken painim rot i go long ples wantaim Wantok kru...



Kanage na Mista Johnson

WANPELA nait Mista Johnson wantaim famili bilong en i askim Kanage long go kaikai wantaim ol long Karanas.

Taim Kanage kamap, ol i amamasim em na welkamim em i go long kaikai tebol.

Taim ol i sindaun na kaikai i stap, wanpela dok bilong famili i wok long lukluk strong long Kanage i kaikai i stap. Kanage tait long kaikai na em tu lukluk strong long dok i stap.

Na Kanage i kirap na askim Mr Johnson long wai na ol dok bilong en i wok long lukluk strong long en i stap.

Mr Johnson i bekim long Kanage olsem, "Noken wari long ol. Ol jeles long wanem yu kaikai long plet bilong ol."

UPNG POM SITI

Animal Killer

ANKEI Kanage em i wanpela ankel bilong dinau stret long ol liklik taka bokis long haus yet. Ankel Kanage i wok long mekim dispela dinau pasin bilong em i go na ol stoa kipa i bel kaskas long em pinis.

Taim ol stoa kipa i lukim olsem ankel Kanage i kam long stua bilong ol, ol i save hait o go auasait.

Wanpela taim, ankel Kanage i go long dinau long wanpela taka bokis i gat step o leda long en i stap.

Stua kipa i lukim Kanage longwe yet na em i go hait aninit long kaunta.

Ankol Kanage i kam lukim olsem no gat stoa kipa, tasol em i save olsem stua kipa em i hait i stap.

Yu save, ankel Kanage ya i giaman long pairapim leda i go daun, tasol isi isi tru, em i kamap antap gen na wetim kipa long kaunta i stap.

Taim stoa kipa isi tru i apim het long spaim Kanage, ankel Kanage i makim long pinga tasol na tok, "Beng!! Wanpela tinpis i kam."

Ankel Kanage em ankel Kanage. No play up!! MADANG


Papa Kanage long Waigani opis

WANPELA taim bubu Kanage i go long opis bilong praim minista long Waigani. Tasol taim em i kamap long opis, ol sekyuriti long hap i laik rausim em long wanem ol i no save olsem em i kam long lukim praim minista.

Lapun Kanage i kirap na tokim ol sekyuriti olsem, "Hey, yu ting mi the small boy ah, Mi the papa to Peraim Miniesta ah. Mi the papa ahio ol i les long lalim mi go intait yah. Me mekit the wat."


Ol sekyuriti i harim em i toktok na ol lap indai i stap. Ol i bisi long lap na lapun Kanage i go insait hariap tru long opis.

Gras ruts man Waigani




Stat hia

Yu pinis! Em ples bilong yu



EM ORAIT




EM NOGUT

Ol wod lista hia:

- ASBIN
ADMINISTRETA
AFRIKA
BIKMAN
BLAKBOKIS
DONKI
DUIM
ENVAIRONMEN
FIKUS
GRASRUT
GUTNEM
HATWARA
HAUSBOI
HOMBRU
INFEKSEN
JOINIM
KALANG
KALAKALAP
KOKOMO
LUKSAVE
METAIM
MOSEN
NIDIM
OPERETIM
PAPAMAMA

A large grid of letters for a word search puzzle, containing various words related to the theme.

Ansa bilong Wod Pilai isu 2133







# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**

6am - 7am **6080; 7240(KHZ)**

7pm - 9pm **5995; 6020; 9710; 1280(KHZ)**



Sunami na guria i bagarapim Solomon Ailan long las yia.



Praim Minista bilong Vanuatu, Sato Kilman i autim tingting bilong em.

## PNG na Indone- sia bai investige- tim Indonesia plak i flai long boda

Papua Niugini Difens Fos (PNGDF) i tok Indonesia i no gat rait long apim plak bilong en long graun namel long boda wantaim PNG.

Plak bilong Indonesia i no ken flai long ples namel long boda wantaim PNG. Komanda bilong PNGDF Gilbert Toropo i toktok wantaim ABC nius.

Em i tok ol pipel bilong wanpela ples long Western Provins boda wantaim Indonesia ol i rong long apim ol plak bilong Indonesia.

Komanda Gilbert Toropo i tok wanpela ples i bin flaim plak bilong Indonesia i stap long ples we i no-man's land, maski em i klostu moa long hap bilong PNG.

Em i tok aninit long ol protokol o pasin bilong boda namel long tupela kantri, ol i no ken sanapim plak bilong tupela boda kantri long dispela no-man's land.

Mista Toropo i tok klia long dispela bihain long sampela nius ripot olsem, ol PNGDF patrol i bin go insait long Yakyu Vilis long hap bilong Indonesia long Fraide na i rausim tupela plak bilong Indonesia.

Em i tok em i bin toktok pinis wantaim Defence Advaisa bilong Indonesia na bai ol i wokim wanpela joint-investigesen bilong stretim dispela boda isiu.

## Solomon Ailan i kisim hevi long bikpela san

Bikpela san long dispela kain taim em ol i kolim El Nino nau i wok long kamapim ol bikpela hevi na wara i sot long Westen Provins long Solomon Ailan.

Primia George Lilo bilong Western Provins i toktok wantaim ABC long dispela hevi. Em i tok no gat ren i bin pundaun long provins long foapla mun nau.

Bosman bilong Weather Bureau, David Hiriasia i tokim ol pipel long lukautim gut ol liklik wara na no ken westim.

Ol pipel bilong Gizo, bik-taun bilong Westen Provins i wok long go long bik moning tru bilong kisim wara.

Primia Lilo i tok ol i bungim bikpela hevi long wanem paip i save karim wara em i olupela tumas na wara i save weist nating long en.

Em i tok dispela paip em i bin stap longpela taim pinis na nau em i askim nesanel gavman long helpim ol long putim ol nupela wara paip

## Makira Ulawa Provins i laikim Stet Gavman

Primia bilong Makira Ulawa Provins long Solomon Ailan i tok bai no gat tru developmen i kamap long provins aninit long gavman sistim we i stap long kantri nau.

Primia Thomas Weape bilong Makira Ulawa Provins long Solomon Islands i toktok wantaim ABC long dispela samting.

Primia Weape i tok em i no isi long provins i develop long mak ol pipel i laikim aninit long sistem bilong gavman tude.

Em i tok dispela em long wanem, aninit long gavman sistem nau, ol provins i ejent tasol bilong nesanel gavman na i no gat pawa.

Em i tok gavman bilong em i no gat mani na wokman long developim provins long wanem, ol i mas wetim nesanel gavman long givim ol dispela long ol.

Mista Weape i tok, bai mo-beta sapos ol provins i kamap olsem ol stet aninit long federal gavman sistem, na ol i ken kontrolim mani na wokman bilong ol yet.

Primia Weape i mekim dispela toktok taim Radio Australia i askim tingting bilong en long sait long developmen bihain long 32 yia Makira Ulawa i kamap olsem wanpela provins.

## Wari long poison insait long Warongoi River long ENB

Gavman bilong Is Briten provins long Papua Niugini nau i gat wari nogut posin pipia bilong wanpela main long provins i go insait long wara na kamapim hevi long helt bilong ol pipel.

Blaise Magaga bilong Is Nu Briten provinsal gavman i toktok ABC Nius olsem i bin gat ol ripot olsem posin bilong Sinivit main i bin kapsait i go insait long Warongoi riva na kilim ol pis na mekim ol pipel husat i bin kaikai ol dispela pis i sik.

Provinsal gavman i givim pinis ol tok lukaut long ol pipel long no ken yusim wara i kam long Warongoi, tasol nau em i taim bilong bikpela san na ol i save go yusim yet dispela wara.

Dispela bikpela san i wok long kamapim hevi long PNG na tu long Solomon Ailan long foapela mun nau.

## Solomon Ailan i klia moa long hevi bilong guria na sunami

Ol disasta atoriti i tok pipel bilong Solomon Ailan nau i save moa long ol hevi na wanem samting ol i mas wokim long taim bilong disasta.

Sunami i bin bagarapim sampela hap bilong Solomon Ailan long 2013.

Dairekta bilong Solomon Ailan Nesanel Disasta Mesenemen Opis, Loti Yates i toktok wantaim ABC long dispela samting .

Mista Loti Yates i tok pipel i mas muv long lukautim safeti bilong ol taim ol i pilim graun i guria o i wok long seksek – em i tok ol pipel i no ken wet.

Em i tok dispela i namba wan tok lukaut ol pipel bai i kisim.

Mista Yates i mekim dispela toktok bihain long sampela guria i bin kamap long Solomon Ailan long sampela de i go pinis.

Em i tok bihain long sampela bikpela guria na sunami i bin kamap long Solomon Ailan stat long 2007, ol pipel long kantri i save pinis long hevi bilong ol kain birua olsem na wanem samting ol i mas wokim.

## Wari long ol pasin nogut long ol pikinini

WANPELA stadi i lukim olsem hevi bilong mekim ol

pikinini i wok long kisim mani na seksuel abius i save kamap bikpela long ol loging operesen long Solomon Ailan.

ABC Nius i tok dispela i kamap klia long wok painim aut ol i kolim Child Trafficking and Commercial Sexual Exploitation of Children em Save the Children i bin mekim long Solomon Ailan.

Child Protection Manager bilong Save The Children Solomon Islands, Veronika Maebiru i tok ripot na rekomendesen long dispela stadi ol i bin givim long gavman long dispela wik.

Mis Maebiru i tok ol stori we ol i kisim long ol kain kain hevi we i kamap long ol liklik pikinini ol i sori samting tru.

Em i tok Solomon Ailan i nid long kamapim ol lo we i lukautim gut ol

## ANZ ripot i tok long givim moa lektrik pawa long ol PNG rural eria

Wanpela ripot bilong ANZ long sait long lektrik pawa long Papua Niugini i lukim olsem kantri i nid long developim moa dispela samting.

Ripot ol i autim long dispela wik i soim olsem, planti long ol lektrik pawa PNG Power i gat nau i go tasol long ol bikpela developmen projek.

Long wankain taim, planti moa pipel bilong PNG i stap long ol rural eria, i kisim tasol 8 pesen long pawa.

ANZ ripot ol i kolim Powering PNG into the Asian Century.

Ripot i tok tu olsem PNG

bai inap sevim 5 bilien dola long sait long pawa i go inap long 2030, sapos em i yusim ol arapela kain wei bilong kisim pawa.

Praim Minista Peter O'Neill i stap tu long taim ol i autim dispela ripot long Tunde dispela wik. Ripot ol i autim long dispela wik i soim olsem, planti long ol ilektrik pawa i kam PNG Power i go tasol long ol bikpela developmen projek.

## Ol jenalis na Praim Minista bilong Vanuatu i stretim toktok

Ol jenalis bilong ol nius media long Vanuatu wantaim Praim Minista Sato Kilman, nau i luksave long tingting bilong wanpela narapela long wok long media.

Praim Minista Sato Kilman bilong Vanuatu i autim tingting bilong em wanem em i lukim olsem sampela stori ol i no skelim gut na planti ripot i go egensim gavman tasol.

Na ol jenalis tu i givim tingting bilong ol long gavman i no save givim aut infomesen ol pipel i laik save long ol samting we i gohet insait long gavman sistem.

Mista Kilman, deputy praim minista na sampela moa senia pipel long gavman i bin bungim ol lain bilong nius media long Port Vila long dispela wik.

Wanpela long ol jenalis husat i stap long dispela miting em i Moses Steven, husat i Presiden bilong Pasifik Ailan Nius Asosisesen (PINA).

Mista Steven i tok tupela sait wantaim i benefit long dispela miting.



# OTML papagraun kisim 33 pesen onasip



SIF Seketeri, Sir Manasupe Zurenuoc, Westen Provins Gavana Ati Wobiro na Westen provinsal edministreta Dokta Modowa Gumoi sainim agrimen long Tunde dispela wik long Pot Mosbi.

**PAPUA Niugini gavman i tok orait long ol papagraun grup bilong OK Tedi maining bai kisim 33.3 pesen bilong OK Tedi maining.**

Olgeta papagraun grup i wanbel long kisim 33.33 pesen bilong Ok Tedi maining na i sainim tok orait pepa na kisim i kam long gavman long sainim signetsa bilong Sif Seketeri bilong gavman na edministreta bilong Westen provins.

Long 33.33 pesen bilong onasip bilong maining,

- Star Maunten Lendona kisim 9.11pesen
- CMCA 12.11 PESEN
- Flai Riava Provinsal gavman (Nan CMCA) 12.11 PESEN

Olgeta papagraun grup i wanbel long dispela mak bilong onasip.

Olgeta papagraun grup i wanbel na i sainim agrimen long skelim onasip na long Tunde dispela wik i sainim wantaim Sif Seketeri Sir Manasupe Zurenuoc na edministreta bilong Westen Dokta Modowa Gumoi.

Gavana bilong Westen Ati Wobiro i tok

tenkyu long gavman bilong Praim Minista Peter O'Neill long givim tokorait long ol papagraun bilong gol na kopa main long Ok Tedi bai kisim 33.33 pesen.

Mista Wobiro i tok olgeta winmani i kam long papagraun bai ol i yusim long givim gutpela sevis na helpim long stretim sindaun bilong ol pipel bilong Westen.

Gavana Wobiro i tok tenkyu tu long Mista Zurenuoc long go pas long ol toktok bilong kisim sampela onsip bilong Ok Tedi maining. Em i tok dispela em bikpela samting long ol pipel bilong Westen long kisim onasip long maining.

Mista Zurenuoc i tok dispela em bai namba wan taim long winmani bilong maining bai go stret long ol papagraun na i soim olsem PNG em i senis na taim i kamap long givim sevis long ol papagraun.

Ol agrimen ol papagraun i sainim wantaim Westen provinsal edministreta na Sif Seketeri bai i go long Nesenel Eksektiv Kaunsil long kisim laspela rokorait bipo long ol papagraun bai kisim winmani bilong maining.

## Lokol fama nidim sapot long apim saplai

### Stanley Nondol i raitim

GAVMAN i putim tambu long ol kampani i bringim sampela fres kaikai i kam long ol ovasis kantri long promotim ol lokal fama long groim ol kaikai na givim saplai long lokal maket. Tasol bikpela wari em olsem ol fama i no redi yet.

Westen Hailens Semba bilong Komes na Industri i tok Egrikalsa Minista Tommy Tomscoll i laik helpim ol lokal fama tasol ol i no redi yet long groim inap saplai long bungim mak bilong ol kaikai ol pipel i nidim long kantri.

Presiden bilong Semba, James Leahy i tok gavman i no mekim ol awenes olsem em bai stopim ol impot bilong fres produs na ol fama i no redi long planim inap kaikai long apim saplai.

Minista bilong Egrakalsa Timmy Tomscoll long las wik i stopim olgeta fres produs olsem soya bin, raun anian,

bilong royalti bai go long ol 7-pela kaunsil wod stap klostu long projek eria. Em i tok bai i no gat lenona asosisen tasol ol pipel bai kisim royalti na ol sevis bilong pro-

kerot, kepsikum poteto, pamken, bin, egplen, zukini, pis,tomato na letis.

Long wankain taim Presiden bilong Hailans Setlas na Famas Asosiesen Wilson Thompson i tok gavman i no gat gutpela polisi bilong sapotim egrikalsa na ol fama i kisim taim bikos kos bilong ol samting ol fetelaisa, ol gaden tul na ol arapela samting i dia tumas.

Mista Thompson i tok gavman i mas wokim awanes na stretim ol infrastraksa bilong maket na sapotim ol fama bikos egrikalsa i sapotim moa long 6 milien manmeri na pikinini long kantri.

Mista Leahy i tok ol fama nidim bikpela taim long groim ol prut na arapela kaikai long kisim ples bilong ol impot na nau ol i no redi na diman i stap yet na em bai hatwok long ol fama bilong PNG i givim saplai long olgeta hap long kantri.

Mista Leahy i tok namba

wan samting em gavman i mas mekim awenes na sapotim ol fama long ol i ken wok hat long groim ol dispela kaikai long givim inap saplai long kantri.

Mista Leahy i tok moa olsem gavman i wokim gut tasol ol fama i no redi na i luk olsem ol grin haus long Pot Mosbi we ol i wok long planim ol kaikai tasol bai kisim gutpela sevis long maket prais na ol fama bai no inap kisim bikos ol i no save wanem taim bai gavman helpim ol.

Ol kampani husat i wokim grin haus na planim ol kaikai i bilong narapela kantri.

Em i tok sapos gavman i tingting na i gat plen long sapotim ol lokal fama bilong Papua Niugini, orait em i mas sapotim ol fama gut na i no ken tingting long intres bilong ol ausait kampani i kam mekim wok bilong planim ol kaikai long ol grin haus long Pot Mosbi.

gavman bai apim ol sevis olsem royalti na ol arapela. Nau em i taim bilong ol pipel bilong tupela provins i kisim ol gutpela sevis i kam long ol risos na graun bilong ol.

## Sir Julius laik ol pipel kisim sevis long Solwara 1 projek

**GAVANA bilong Nu Ailan Sir Julius Chan i tok gavman bilong em i wokhat long ol pipel bilong em long provins bai kisim ol sevis bilong Solwara 1 pojek Natilus Minerels kampani bai go pas long en.**

Sir Julius i tok em i bin gat bikpela wari long ol bagarap olsem envairomen bai kamap taim projek i kirap long solwara bilong Nu Ailan na Is Nu Briten .

Em i tok Nesenel Gavman

i givim laisens pinis long Natilus Minerels long Janueri 2011. Em i tok Nu Ailan provinsal gavman na ol pipel i wari long ol bagrap bai kamap. Tasol projek bai go het tasol em i tok ol pipel bilong Nu Ailan i mas kisim ol sevis bilong projek long ol winmani kampani bai mekim.

Em i tok Nu Ailan provinsal gavman wantaim Is Nu Briten Provinsal gavman i bin wok long kamap wantaim wanpela agrimen long rot bilong skelim

ol sevis bilong Solwara 1 projektasol dispela agrimen i no bin kamap orait.

Sir Julius i no wanbel long toktok bilong gavman olsem i no gat ol papagraun bilong Solwara 1 projek we bikpela wok maining bai kamap aninit long solwara bilong Nu Ailan na Is Nu Briten . Em i tok ol pipel bilong Wes Kos bilong Namatanai na Sentral Nu Ailan LLLG em tu ol papagraun bilong projek.

Sir Julius i tok 20 pesen



### The new Fokker 70 jet service. Faster, higher, smoother.....

Call Toll Free on 180 3444 or contact your nearest Air Niugini Travel Centre or Travel Agent to learn more about our F70 jet service.





# Sinia Militeri Opisel: Australia joinim long bomim Syria bai no inap kamapim senis



Ples i paia bihain long tromoi bom long boda taun bilong Syria, Kobane. Amerika i go pas long ol lain i karimaut ol eastraik o tromoim bom long balus i go long ol strongpela ples bilong ol Islamik Stets (IS) teroris.

PRAIM Minista bilong Australia, Tony Abbott i tok Amerika i askim Australia long joinim Amerika i karimaut eastraik long ol IS long Syria.

Askim i kam bihain long wanpela Palamen memba bek bensa, Dan Tehan i tok Australia i mas go insait long pait egensim IS na pasin teroris bikos planti pipel tru i kisim hevi na bagarap, na i mas gat sekyuriti long Syria.

Tasol bosman bilong Join Sif Operesen, David Johnston, i tok go insait bilong Australia i no inap kamapim senis, tasol kamapim hevi long ol lain Australia bai stap insait long misin.

# Dibet long kamapim lo bilong ol man na man na meri na meri i marit.



Australia bai kisim bil long "same sex marriage" o man na man na meri na meri i marit i go long palamen na paitim toktok long en long neks mun.

Bek bensa, Warren Entsch, i bin toktok long dispela samting long Palamen bung long dispela wik.

Long wan wan taim, tpela spika tasol bai kisim 5 minit long paitim toktok long dispela samting.

Em i no klia sapos komiti bai wanbel long larim moa spika long bihain taim na sapos bai gat vot long dispela samting.

# Oda long Kathy Jackson kisim kot oda long peim AuD \$1.4m kompensesen

Helt Sevis Yunien (HSU) i kisim Mis Jackson i go long Federal Kot bikos ol i sutim tok long em long paulim bikpela mani bilong fan long baim ol samting long mekim

emm i amamas olsem ol at o peinting, stail laipstail na ol kain samting olsem. Ol i sutim tok long em tu long yusim AuD\$100,000 bi-long HSU long divos long

man bilong em, foma yunien man, Jeff Jackson. Bipo long Federal Kot trail long las mun, Mis Jackson i bin tokaut olsem em i no gat mani long benk.

# Trigana Balus i pundaun long las Sande long Wes Papua



Ol beg i gat ol bodi bilong 54 manmeri i dai taim balus i kres o pundaun. Ol ses na reskyu tim i painim na putim ol bodi insait long ol bek nan au ol i wetim balus long kisim ol.



Ses na reskyu tim bilong Indonesia i painim ol bodi long Trigana Balus ran i bin birua long Wes Papua provins bilong Indonesia long las wiken.

Wok painim i no bin hariap tumas na bihain long tupela de, ses na reskyu tim i bin go kamap long ples we Trigana balus ran i bin go daun na birua long las wiken.

Ol i bin painim 54 dai bodi long bikbus na maunten bilong Is Wes Papua. Bikpela ren i bin kamapim hevi long ol reskyu na ses lain long mekim wok bilong ol.

Ol pipel long eria i bin painim 54 bodi na putim ol bodi insait long ol bek taim ol ses na reskyu tim i go kamap.

Ol i painim tu blekpela bokis na em i stap gut. Dis-pela bai helpim ol as long balus i birua long en.

Ol Poto: ABC



Mis Jackson husat i kisim tok sut long paulim \$1.4 milien long baim ol samting bilong em yet.



# Singaut long gavman daunim 2015 baset

# Egrikalsa rifom i mas kamap

**Stanley Nondol i raitim**

HAILAN Famas na Setlas Asosisesen i singaut long gavman i mas kamapim rifom long egrikalsa sekta long sapotim bikpela populesen bilong kantri, ol SME bisnis na helpim ikonomi bilong kantri.

Presiden bilong Asosiesen, Wilson Thompson i tok gavman i putim bikpela milien kina na lukluk long maining, oil na ges long groim ikonomi tasol egrikalsa em bikpela sekta long kantri we moa long 85 pesen bilong populesen stap na ol i nidim sapot bilong gavman.

Mista Thompson i tok ol ekspot komoditi bilong egrikalsa long wol maket i pundaun na planti ol liklik manmeri long ples na ol liklik fama i wari long ol i no kisim sapot bilong gavman long

wok long egrikalsa sekta long ol i ken sapotim ol yet.

Em i tok Minista bilong Egrikalsa Tommy Tomscoll i mekim sampela gutpela wok long stopim ol kakaruk mit bilong Australia na tu stopim ol impot bilong ol pres produs kaikai olsem anian, poteto na sampela na dispela bai givim sans long ol lokal fama long groim ol kaikai na kakaruk.

Mista Thompson i tok prais bilong Kakaruk na ol kaikai we Minista Tomscoll i stopim i bai go antap tasol em bai long liklik taim tasol na ol pipel bilong kantri bai kisim gutpela servis long bihian taim ol i planti moa kaikai na salim long maket we bai i gat gutpela maket long kisim mani.

Minista Tomscoll long dispela yia i pasim impot bilong mit bilong Kakaruk i kam long Australia na abrusim ol sik

bilong kakaruk i kam long kantri na tu long givim sans long ol lokal kakaruk fama long lukautim planti kakaruk na salim insait long kantri na kisim mani.

Long dispela mun Minista Tomscoll i stopim ol impot bilong ol kaikai olsem balb anion, na potato na karot.

Mista Tomscoll i tok long helpim ol fama long apim saplai bilong prodaksen bilong ol gavman i mas salim ol wokman i go long ol fama na kamapim ol trening na helpim ol fama long ol i ken salim ol gaden kaikai long eria ol i planim na kisim mani.

Em i tok sapos gavman i laik kamapim moa long 500,000 SME long kantri long 2030, gutpela lidasip i mas kamap long Dipatmen bilong Egrikalsa na Laipstok, bod bilong Egrikalsa Komoditi, na ol rises ejensi long ol i mas wok

hat wantaim ol fama.

Mista Thompson i tok moa olsem nau ol fama i kisim taim bikos i no gat gavman sapot na tu prais bilong ol samting olsem ol tul o wok samting bilong egrikalsa olsem gaden tul, fetelaisa i dia tumas.

Em i tok kos bilong prodaksen em i antap moa na ol fama no inap long apim prodaksen. Dispela i lukim ol fama i apim prais bilong ol samting na ol konsuma ol pablik i painim hat long baim na i no helpim egrikalsa sekta long gro.

Mista Thompson i tok Egrikalsa Minista Thompsoni stat long mekim sampela gutpela wok long polisi na lo na lukim i stopim ol impot tasol gavman bilong Papua Niugini i no gat plen long sapotim ol fama na i no sapotim long planti yia.

**Stanley Nondol i raitim**

SINGAUT i go long gavman long kamapim wanpela saplamenti baset na daunim K16 bilien 2015 baset bikos kantri i no gat inap mani long wokim wok bihian go daun bilong oil prais na ol prais bilong ol arapela minerels na ol komoditis long wol maket.

Oposisen lida Don Polye, deputi Sam Basil long las wik i tok i gat nid long gavman i mas kamapim saplamenti baset na gavman i mas tok stret bikos kantri no gat inap mani.

Oposisen i tok gavman i wok long yusim planti mani i no stap long baset na tu kisim bikpela dinau long ausait na kantri bai bekim bikpela dinau long ol yia i kam.

Tupela lida i mekim dispela singaut bihain long Minista bilong Tresari Patrick Pruaitch i tokaut long ripot bilong namel bilong yia olsem PNG i no gat inap mani bilong 2015 baset.

Mista Pruaitch i tok kantri i plenim 2015 baset long K16.2 bilien tasol yumi i no gat dispela mani long putim long mani plen.

Mista Basil i tok Minista bilong Tresari i tok tru na O'Neill gavman i no gat narapela rot long daunim hevi bilong mani i sot tasol gavman i mas tok tru long ol pipel olsem mani i sot na kwiktaim wokim saplamenti baset.

Planti tokpait i kamap taim

Minista bilong Tresari i autim ripot bilong kantri. Tasol Praim Minista Peter O'Neill i tok kantri i gat inap mani long kisim long putim mani long mani na plen na tokim PNG long no ken pret long ol toktok bilong Oposisen na ol arapela olsem mani i sot.

Dispela toktok na hevi bilong mani i kamap bihain long prais bilong oil long wol maket i pundaun na PNG LNG i no mekim inap mani.

Tasol gavman i strongim 2015 baset na i tokim kantri olsem gavman i luksave long wanem samting i kamap long ol prais bilong mineral na oil long wol maket na i gat inap mani long risev i stap long mani mak bilong K6 bilien long ranim kantri.

Praim Minista Peter O'Neill, Minista bilong Fainens, James Marape tok ol toktok bilong Don Polye i no ken pretim ol bisnis na ol investa bikos gavman i gat inpa mani na bai go het wantaim mani plen long K16.2 bilien.

Minista bilong Fainens James Marape long wanpela pas i go long midia i tok taim gavman i mekim baset em i mekim long tingting olsem prais bilong ol komoditis bai kam daun na i go antap. Baset i stap namel long ol prais go antap na kam daun.

Em i tok pundaun bilong oil prais long wol maket na prais bilong LNG bai no inap bagarapim mani plen bilong kantri long K16.2 bilien.

# Gavman i painim kampani long bosim Lae na Mosbi bris

GAVAN i wok long painim wanpela gutpela kampani long menesim nupela bris long Motukea long Pot Mosbi na Lae Taidel Basin projek long Lae.

Sif Eksektiv Opisa (CEO) bilong PNG Ports Limited Stanley Alphonse i tokaut olsem kampani i wok long edvetas long lokal na ovasis midia long kisim wanpela intenesenel kampani i gat bikpela save long wok bilong menesim ol kain bikpela sip bris olsem long menesim Pot Mosbi na Lae bris.



Nupela Motukea bris ausait long Pot Mosbi.

Mista Alphonse

i tok "Taim mipela i putim long midia long kampani husat i gat laik long wok wantaim mipela long salim pepa na soim laik. Mipela bai lukluk long ol pepa ol i salim na tokim ol long aplai tenda bilong projek.

Gavman bai makim wanpela kampani long menesim teminel long tupela bris bihain long olgeta wok i pinis na i redi long givim servis.

"Papua Niugini i lukim bikpela ikonmik grot long las 10-pela yia na i stap long gutpela posisen insait long Westen Pa-sifik na klostu long ol Esien maket. PNG em wanpela kantri we ikonomi i gro kwik insait long rijon na opim bikpela sans bilong mekim ol bikpela bisnis na opim

dua bilong wanpela wol klas opereta long wok wantaim PNG Ports long Lae na Mosbi bris," Mista Alphonse i tok.

Em i tok Lae siti na Mosbi siti em i rot bilong intenesenel sip na i opim sans bilong praivet sekta opere-sen na invesmen patna long wok bung long groim bisnis insait long rijon.

Long Pot Mosbi bris bai lukim kampani husat i winim kontrak bai me-nesim nupela intenesenel kontena teminel we wok nau i go het long Motukea long Sentral provins. Dispela developmen patna tu bai lukautim Lae Taidel Besin.

Pot Mosbi bris nau lukim i save wok long 65,000 yunit long wan wan yia na 175,000 kontena bilong ol jenerel kago. Ol bai surukim dispela servis i go long Motukea.

Na Lae bris i wok wantaim 140,000 yunit 365,000 jenerel kago long kontena sip.

Mista Alphonse i tok kampani i lukluk long kirapim namba tu hap wok bilong Lae Taidel Besin projek long K350 milien na i putim tok save pinis long lokal na intenesenel lida long wanpela kampani i ken aplai na kam wokim projek long kantri wantaim gavman.

## Specials from the 1<sup>st</sup> July to 31<sup>st</sup> August 2015

SECTORS	ONE WAY INCL TAXES	RETURN INCL TAXES
Daru - Port Moresby	585.41	1,123.08
Kiunga - Port Moresby	775.81	1,481.48
Lihir - Port Moresby	899.11	1,716.28
Losuia - Port Moresby	633.46	1,212.36
Mendi - Port Moresby	668.71	1,279.88
Popondetta - Port Moresby	346.56	673.48
Tari - Port Moresby	887.16	1,691.08
Wapenamanda - Port Moresby	606.66	1,163.08
Tabubil - Port Moresby	880.56	1,677.48
Kiunga - Mt Hagen	692.51	1,324.68
Lihir - Rabaul	316.86	620.28
Mt Hagen - Lae	502.11	966.28
Rabaul - Hoskins	370.21	721.88

\* Taxes included



Reservations - Toll Free: 1805465  
 Email: [sales.linkpng@airniugini.com.pg](mailto:sales.linkpng@airniugini.com.pg)  
 Find us on Facebook: [www.facebook.com/linkpng](http://www.facebook.com/linkpng)



# Ol rurel fama amamas long tambu long ovasis fres kaikai

James G. Kila i raitim

**PLANTI ol rurel fama insait long kantri bai amamas long disisen bilong agrikalsa Minista, Tommy Asik Tomscoll long putim kamap tambu long bringim sampela ol fres gaden kaikai i kam long ovasis. Tasol salens nau i stap long ol rurel fama long groim moa kaikai na salim moa wantaim gutpela kwaliti.**

Wanpela fres fud saplaia bilong Dauulo distrik, Sim Weambo i tok olsem em i amamas long gutpela disisen bilong Minista Tomscoll long promotim lokal fres fud indastri.

Mista Weambo i tok wok nau i stap long ol rurel fama long groim moa fres kaikai na salim na tu kamapim gutpela kwaliti kaikai we i bihainim helt lo na regulesen long redim na pekim gut na salim.

Em i tok amamas long disisen bilong Egrikalsa Minista, Mista Tomscoll long putim

tambu long bringim i kam insait long fres gaden kaikai olsem potato, balb o raun onion, kerot, tomato, kapsikum, pamken, pi, jukini, eg plent, paksoi o Sainis kapis, Frens bin, letas na seleri.

Long las wik Tunde, Minista Tomscoll i sainim pepa long tambu long ol dispela kaikai na long Trinde, disisen i go insait long Nesanel Gazet pepa bilong Gavman olsem Lo nau.

Wanpela model fres fud fama long Kurumbukari, Albert Denguo i tok olsem ol sid bilong ol kaikai we ol lokal fama i ken groim i stap long stua na em i amamas olsem ol lain bilong maining kampani Ramu NiCo (MCC) long Kurumbukari i save givim em long planim.

Em i tok PNG i gat gutpela graun we i gat gutpela gris we ol samting we ol ovasis lain i save groim i ken kamap gut stret long hia.

Long las wik tu wanpela

lokal fres fud saplaia long Westen Hailans i tok amamas long disisen bilong Minista Tomscoll long putim tambu long bringim ol dispela gaden kaikai olsem potato, balb o raun onion, kerot, tomato, kapsikum, pamken, pea, jukini, eg plent, paksoi o Sainis kapis, Frens bin, letis na seleri i kam insait long kantri.

Menesing dairekta bilong Wisky Fres Limited, Berry Maip i tok amamas long minista Tomscoll long disisen bilong em.

Mista Maip i tok olsem longpela taim ol sampela bikipela stua i save bringim ol ovasis kaikai i kam insait na no save baim ol lokal fres fud, olsem na disisen bilong Minista Tomscoll em i gutpela.

Em i tok tu olsem ol lokal fama long PNG i ken groim moa fres kaikai na kamapim gutpela kwaliti, tasol planti taim ol bikipela stua i save bringim ol fres kaikai bilong ovasis i kam insait long salim.



Wanpela rurel fama long Kurumbukari i redim eria long planim bin na kapis.

# Kokopo Maket i kisim nupela bet bilong salim kaikai

Tony Sapan – Lahir i raitim

OLGETA wok bilong putim ol bet bilong salim kaikai long Kokopo Maket i pinis nau wantaim 9-pela nupela bet nau i stap long haus bilong maket.

Taim dispela ol nupela bet i kamap long Julai, em i makim stat bilong gutpela taim bilong ol lain i save salim ol prut, na kaikai long klinpela hap, we pastaim ol i save salim tasol antap long simen plua bilong maket.

Bos bilong maket, Palan-

gat Akuila i tok ol nupela bet insait long haus maket em bilong kamapim gut ol hap bilong salim kaikai long maket.

Mista Akuila i tok bai ol i wokim tu ol nupela bet bilong salim kaikai i go long haus bilong salim kumu taim olpela bet wantaim ol bet bilong salim ol kuk kaikai.

Long wankain taim tu, Mista Akuila i tokaut olsem ol i pasim namba wan toilet inap long sampela taim nau, na ol i wet long ol bai pinisim

wok bilong digim nupela baret bilong kirapim nupela toilet.

Em i tok pastaim toilet i bin pulap bihain long wanpela yia tasol long ol i wokim, olsem na ol i wok long yusim namba tu toilet long taim ol i pasim namba wan toilet. Ol i bin tromoi K37,000 long yia i go pinis long wokim namba wan toilet. Taim ol i wokim gen, dispela toilet bai inap stap long 5-pela yia bihain bai em i pulap na bai ol i senisim.

# Australia gavman givim \$1.9milien moa long PNG Korol Traiengel



Ol saientis i wokabaut long naispela nambis bilong solwara bilong PNG.

RIJONAL Korol Traiengel Inisetiv bilong ol Korol Rif, Piseris na Fud Sekyuriti (CTI-CFF) em i wanpela ki fokas bilong ol toktok namel long Australia Minista bilong

Environmen, Greg Hunt na Papua Niugini Minista bilong Environmen na Konsevesen na Kalimet Senis, John Pundari long dispela wik.

Mista Hunt i tok em i ama-

mas long tokaut olsem Australia Gavman bai putim A\$1.9 milien moa long helpim PNG long wok bilong lukautim ol Korol Traiengel long kantri.

"Korol Traiengel ikosistem

# Saveman stretim rot bilong lukautim netsurel disasta long PNG

I GAT bikipela sans long narapela 50 yia olsem PNG bai lukim planti hevi we bai yusim mani long mak bilong US \$700 milien we klostu long 5,000 dai na bagarap bai kamap long ol graun Guria na ol saiklon.

Dispela tingting em i kamaut long ol tingting skelim bilong 2011 Pasifik Katastropi Risk Asesmen.

Papua Niugini em i stap long wanpela hap bilong graun we isi tru long ol bikipela hevi ken kamap long en. Na ol kain kain disasta i mekim hat tumas long menesim olsem na em i mas gat disasta menesmen plen bilong em yet we saiens i mas stap insait long olgeta eria bilong mekim disisen long olgeta sekta.

Tude Dipatment bilong

Mineral Polisi na Geohazards Menesmen na Nesanel Disasta Senta i wok long holim wanpela disasta saiens infomesen sesen long olgeta teknikel patna wantaim ol ki gavman ejensi, developmen patna ejensi, developmen patna na midia.

Ol saveman na meri husat i makim Papua Niugini na Australia gavman teknikal ejensi bai givim ripot bilong ol wok bung projek i wok long kamap long stretim ol hevi long kantri. Ol toktok i bin kamap long las wik komyunikesen woksop bilong toktok long ol kain birua i save kamap, long Kokopo, Is Nu Briten.

"Sapos yumi i wokim ol saiens wok long bihainim stret kain graun na ples long PNG, em bai yumi i mekim isi long

ol gavman na ol narapela lain bilong mekim disisen long ol ken wokim gutpela disisen hariap long helpim ol komyuniti. Mipela holim miting tude long em long strongim ol wok poroman we bai helpim mipela long mekim dispela," Dokta Jones i tok.

Bihain bai ol wok bilong was long lukim ol disasta bai go bikipela wantaim ol samting bilong wok long luksave long ol hevi bai kam bihain na long ol rot bilong redim ples. Program i karamapim tu ol hevi olsem graun i bruk, we nau i kamap bikipela na planti taim tumas long ol komyuniti insait long PNG na i putim ol bikipela indastri ples klia long ol tu inap kisim bagarap.

Australia Gavman i sapotim dispela wok program.

i save kamapim kaikai na ol narapela gutpela samting long 120 milien pipel. Australia i gat wanbel tingting long wok bilong Korol Traiengel na i putim sampela mani long mak bilong A\$1.3 milien long sapotim dispela wok, stat long yia 2009. Klostu \$1.7 milien i go stret long sapotim ol wok insait long PNG," Mista Hunt i tok.

"Soim pasin stret em i namba wan long holim strong ol gutpela pasin bilong Korol Traiengel ikosistem we i save kamapim ol helpim long ikonomi na long kamapim kaikai long rijon," em i tok.

Minista Pundari, olsem nau siaman bilong Kaunsil bilong Minista insait long

CTI-CFF kantri, i tok welkam long sapot we Australia i givim na em i ting olsem dispela helpim bai kamapim gutpela kaikai we ol pipel long ol dispela komyuniti inap long lukim stret.

"Taim yumi mekim wok bilong Korol Traiengel olsem wanpela rijon, em bai bringim ai bilong ol narapela kantri i kam long yumi na tu ol bai wok wantaim yumi long sapotim ol tingting bilong yumi long lukautim ol samting bilong solwara i ken stap gut longpela taim bilong ol tumbuna bihain long yusim tu," Mista Pundari i tok.

"Sapot bilong Australia bai helpim yumi long wokim ol projek we i save givim pawa

long ol lokal komyuniti na tu long givim ol moa save na kamapim moa luksave bilong wok bilong lukautim ol solwara long bikipela hap moa," em i tok.

Tupela Minista wantaim i tok, ol i laik lukluk go moa long wok bung long ol narapela wok bilong Korol Traiengel long bihain taim insait long ol ol solwara bilong sauten rijon bilong PNG, olsem long Galp bilong Papua. Aninit long Korol Traiengel Inisetiv, Australia i save wok bung wantaim Indonesia, Malesia, Papua Niugini, Filipins, Solomon Ailan na Timor-Leste long sapotim ol sastenabol menesmen bilong ol Korol Traiengel long solwara.





# Nesenel ERT Salens Bai Kamap long Madang

**PABLIK manmeri long Madang taun na ol sumatin long ol skul insait long provins stat long dispela wiken bai i gat sans long lukim ol imejensi rispons tim i kam long ol bikpela risos projek long PNG i resis insait long namba 5 Nesenel Imejensi Rispons Salens.**

Dispela 2015 Nesenel ER Salens bai stat long Sarere, Ogas 22 na pinis long Tunde Ogas 25 na Ramu NiCo Menesmen (MCC) Limited i go pas long redim salens we bai kamap long graun bilong tupela bikpela skul em Divine Word University na PNG Maritime Koles.

Ramu NiCo (MCC) namba wan nikel/kobalt projek developa long PNG i amamas long redim ol program bilong 2015 Nesenel ER Salens, we bai lukim ol tim i kam olsem long Lihir, Morobe Maining, Oil Search, Porgera, Simberi na Ramu NiCo long resis.

Lihir bai salim tupela tim na ol arapela bai salim wanpela tim long dispela 2015 Nesenel ER Salens long Madang. Ramu NiCo bai gat tupelo tim.

Dispela salens bai lukim ol imejensi rispons tim bilong ol maining na petroleum kampani blong PNG i soim sampela kain stail na wei bilong ol long daunim o abrusim birua long taim

nogut. Ol dispela salens bai lukim ol i soim stail bilong kilim indai paia, givim marasin na helpim man i kisim bagarap, rot long yusim masin long kisim win taim hevi i kamap, helpim man pundaun antap tru wantaim helpim blong rop na tu ol tes long save long sait long rit na rait.

Bikpela as-tingting bilong dispela salens em long ol ERT lain bilong PNG i serim ekspiriens bilong ol na tu lukluk moa long lainim nupela ol rot long sait blong abrusim birua na helpim wanpela arapela long taim bikpela birua i kamap long ol risos projek long kantri.

2015 Ivents Kodineta na ERT kodineta long Ramu NiCo KBK Main, Daniel Round i tok dispela salens long Madang bai go gut stret bikos ol lain ogenaisa i redim ol ples gut stret.

"Mipela amamas tru long soim ol fasiliti na ol samting long Madang taun long ol lain ER tim i kam long ol arapela main insait long PNG," Mista Round i tok.

Em i tokaut olsem ol i stat plenim dispela ER salens long las yia yet na bikpela tingting bilong Ramu NiCo em long lukim olsem salens long Madang i kamap gut stret na winim ol arapela salens we i kamap pastaim.

Long las yia Nesenel ER Salens i bin kamap



Bena bilong ER Salens long Madang ples balus.

ER tim i soim sampela wei bilong pasim rop na helvim man or abrusim birua.

long Kavieng we Newcrest Maining i go pas long redim.

Namba wan ER salens i bin kamap long Lae long 2011. Ol lain ogenaisa bilong 2015 Nesenel ER Salens i tok amamas long ol spona olsem Falck, Scott Safety, Fire Rescue Safety Australia, IPI, Drager, Chubb Fire and Security, Protector Al-safe, Dunlop PNG, Red Earth, Newcastle Rescue, Icom PNG na PWR Australia.



ER tim bilong Ramu NiCo soim pasin bilong helvim man taim em i kisim bagarap.



**Ramu NiCo Management (MCC) Ltd,**  
 the manager of Ramu NiCo Project is proud to host the 5th  
**NATIONAL MINING EMERGENCY RESPONSE CHALLENGE**  
 in Madang  
 Date: August 22-25, 2015  
 Venue: DWU & PNG Maritime College







## Roosters i stap namba 2 long lata

SYDNEY Roosters i daunim Parramatta Eels 28-18 long Sydney Futbol pilai graun long las Sarere nait na i skruim ples bilong en i go antap long namba 2 long lata.

Dispela em i namba wan taim we Roosters i winim 9-pela pilai olgeta long Nesenel Ragbi Lig (NRL) pilai.

Oi Parramatta i stap pas long namba wan hap we skoa i sanap olsem 18-4 na ol i kisim malolo. Long namba tu hap bilong pilai,

ol Roosters i no putim wanpela ples bilong ol Eels i ken brukim banis bilong ol.

Oi mangi long Sydney i strongim banis bilong ol gut tru na krugutim ol Parramatta wantaim 4-pela trai olgeta na i skruim skoa i kam antap olgeta long 28-18 we ol Eels i no bin putim wanpela trai long namba tu hap.

Banis bilong ol Eels i no strong tumas long namba tu hap bilong pilai na Roosters i pambim ol i

pundaun na i putim ol trai long namba tu hap tasol.

Semi Radradra em i pilaia bilong ol Eels, husat i save putim planti trai long ol NRL pilai, i bin putim namba tu trai bilong ol Eels na em i bin mekim namba 19 trai long 15 pilai em bin pilai long dispela yia.

Oi Eels i amamas tumas long namba wan hap tasol ol Roosters i mekim ol i no pilim orait taim ol i daunim ol long namba tu hap.

## Roberts i joinim Titans

PILAIA bilong ol Newcastle Knights, Tyrone Roberts, i joinim ol Gold Coast Titans na Knights i tok orait long em i ken joinim ol bikos dispela em i fainal yia long kontrak bilong em.

Roberts bai pilai tupela yia wantaim ol Titans we ol Titans i save painim wanpela eksperiens hap bek bilong ol taim Cherry Evans i toktok long stap wantaim Manly insait long 4-pela yia.

Kosa bilong Titans, Neil Henry, i amamas long Robert i tok long joinim ol Titans.

“Robert bai kamap namba wan samting long klap wantaim ol Kane Elgey na yangpela Ashley Taylor,” Henry i tok.

“Tryon i save pilaim sampela stail bilong em na namba wan golkipa, husat i bin pilai 100 pilai pinis na i gat planti save i stap.”



Henry i tok moa olsem, “Roberts bai pilai wantaim tupela yangpela pilaia, Taylor

na Elgey, we tupela bai staitim NRL pilai bilong tupela.”

## Guerra na Taufua bai kisim sas



FOWAD bilong Sydney Roosters, Aidan Guerra, na winga bilong Manly, Jorge Taufua, bai kisim sas aninit long lo bilong NRL long solda sas.

Guerra bai kisim tupela wik malolo long givim wanpela gret wan solda sas long Peni Terepo, husat em i pilaia bilong ol Parramatta Eels.

Taufua bai no inap long pilai wanpela pilai bikos em i bin givim wankain solda sas long pilaia bilong Canberra, Jack Wighton.

Prop bilong ol Warriors, Sam Rapiro, em i narapela pilaia bai no inap long pilaia long narapela raun bikos em i givim wanpela strongpela gret wan solda sas long Lewis Brown, husat i pilaia bilong ol Penrith.

Issac Luke, husat i pilaia bilong South Sydney i tok orait long ol i rausim em long wanpela pilai bikos em i bin tromoi wanpela strongpela solda sas long pul-bek bilong ol Cowboys, Lachlan Coote.

Narapela gret wan solda sas tu em i bin tromoi long Jonathan Thurston na ol i bin putim long han bilong NRL lo. Sapos em i no winim dispela kes, dispela huka bilong Rabbitohs bai no inap long pilai tupela pilai na bai misim fainal.

Luke Keary tu i tok orait long em bai stap aut long wanpela pilai long em i bin tromoi wanpela gret wan solda sas long senta bilong Cowboy, Justin O’Neil.

## Panthers i daunim Warriors

PENRITH Panthers i daunim ol Nu Silan Warriors 24-10 long Penrith pilai graun.

Long wankain taim, fowad bilong ol Panthers, Nigel Plum, i tokaut olsem em i lusim pilai bilong em long NRL long las wik Sarere nait long Penrith pilai graun.

Plum i amamas long 150 pilai bilong em long NLR we em i bin winim dispela pilai na i tok aut olsem, “Mi pinis long NRL pilai bilong mi nau

long Penrith pilai graun.”

“Mi amamas na tok tenkyu long ol sapot mi save kisim long ol poroman na ol wan pilaia bilong mi na nau mi bai stap yet long givim sapot long yupela gen.”

Long namba wan hap, ol Panthers i go pas wantaim 20-10 poin.

Bihain long malolo, Warriors i no kisim wanpela skoa bikos banis bilong ol Panthers i strong tumas.

Warriors i strongim banis bilong ol tu long namba tu hap, tasol panthers i strong tumas na i bin putim wanpela trai we kik bilong ol i no go insait.

Warriors i tingting long go insait long top-8, tasol Panther i kisim ol i kam daun.

Dispela lus bilong warriors i mekim na ol i stap tupela poin bihain long namba 8 ples we Bulldog i stap long en.

## Storms i go insait long top 4

MELBOURNE Storms i win na i go insait long top 4 we em i bin daunim ol Cronulla Sharks 30-2 long asples bilong ol Sharks.

Oi man husat i kam long longwe i tru luk olsem Storm na ol i wasim ol Sharks gut tru long tai mol i pait.

Oi Sharks i kwiktaim i go antap long namba bilong premiasip wantaim 8-pela win insait long 9-pela pilai ol i bin pilai pas, tasol Storms i slekim bun bilong ol gut tru long namba 10 pilai bilong ol.

Storms i opim skoa bilong ol long Mande nait taim Jesse Bromwich i brukim banis bilong ol Sharks long 11 minit na i putim namba wan trai.

Taim ol i kisim malolo, skoa i sanap olsem 22-2 we Storms i kisim olget poin namel long 11 na 19 minit tasol.

Oi Sharks i go na smelim trai lain bilong ol Storms 4-pela taim, tasol banis bilong Storms i strong na ol i no putim wanpela trai.

Storms nau i stap long



namba 5 ples long lata taim em i wasim ol Sharks.

Em bai pait wantaim ol Knights husat ol i stap long namba 15 ples long dispela wiken long asples bilong em. Long wik bihain, Storms bai

egensim ol North Queensland husat i stap namba 3 ples long lata we ol bai bai pilai long asples bilong ol Queensland.

Bihain long dispela, Storms bai salensim ol Brisbane, husat i stap pas long lata.

## Blacks i smesim ol Wallabies

OL Nu Silan Blacks i mekim ol Australian Wallabies long pilim no gut taim ol Blacks i daunim ol Wallabies 41-13 long Beldisloe Kap we ol i pilai long Eden Park pilai graun long las wik Sarere.

Kosa bilong Australia, Michael Cheika, i mekim seleksen bilong ol Australia, tasol ol Nu Silan i kam wantaim pawa bilong ol na i winim ol wantaim 5-pela trai na i ranawe long asples bilong ol.

Kepten bilong Wallabies, Stephen Moore, i tok aut olsem, “Ol Wallabies i no inap long pilai wantaim ol All Blacks long longpela taim.”

“Mipela i tingting long pilai gut long planti pilai, tasol ol Blacks i no putim sampela spes we banis bilong ol i strong tumas na mipela i hat tru long daunim ol,” Moore i tok.

“Nu Silan i lus long las wik we ol i pilai wantaim Sydney na ol i bin kisim moa strong long bekim dispela lus long pilai egensim yumi Wallabies na laki tru, ol i win bikos pilai i kamap long asples bilong ol.”

Wallabies i save olsem stat bilong pilai bai strong na ol i statim wanpela strongpela pilai we ol i go pas wantaim 3 poin we Cooper i bin kisim penelti.

Tasol ol Blaks i stap long graun bilong ol na ol i no givim sans long ol wallabies na long 22 minit, skoa bilong

ol Blacks i skruim i go antap long 10-3.

Kepten bilong ol Blacks, McCaw, i bin go insait long namba tu hap bilong pilai na i bin ranim bal gut tru na skruim skoa i kam antap long 41 long pinis bilong pilai na ol Wallabies i ran bihain wantaim 13 poin.





# Hunters bai pinisim maina premiasip yet

**I GAT tupela moa gem i stap yet bipo long fainal na PNG SP Hunters bai pinisim maina premia pas long 2015 Intras Supa Kap Sison.**

Tasol ol bai lukluk long ol risal na bai go insait long fainal we Hunters nau i stap long namba tu ples long lata wantaim 39 poin.

Townsville Blackhawks i gat 39 poin tu, tasol ol i stap long namba wan ples long lata bikos long ol skoa we ol i bin kisim long stat bilong pilai i kam inap nau. Blackhawks i bin kisim 476 skoa na hunters i kisim 211.

Hunters bai pilai wantaim Mackay Cutters, tim husat i stap long namba 8 ples long lata long dispela wiken na bai pilai wantaim Burleigh Bears, husat i stap long namba 9 ples long lata long wik i kam.

Pilai namel long Hunters na Bears em bai pinis bilong ol pilai long go insait long ol fainal we ol bai pilai long Sir John Guise pilai graun.

Blackhawks i gat tupela pilai i stap yet we em bai pilai long dispela wiken wantaim Sunshine Coast Falcons, husat i stap namba 11 long lata. Long wik i kam, bai ol i pilai wantaim Redcliffe Dolphins husat i stap namba 7 ples long lata.

Ol tim husat i stap long namba 3, 4, 5 na 6 ples em ol i stap bihain olgeta long ol bai i gat sans long kamap maina premia.

Ol dispela tim bai pait strong long tupela pilai i stap yet long kisim ples long top 6 long go long fainal.

Kosa bilong SP Hunters, Michael Marum, na ol ol pilai bilong em bai lusim Kokopo na kam long Pot Mosbi tude (Fonde) long go long Mackay long Kens, Australia.

Hunters i daunim Seagulls long las wik Sande 36-13 na kwiktaim, ol i go bek gen long bes bilong ol long Kokopo bikos i no gat planti taim i stap.

Ol i tren insait long tripela de tasol long go long Mackay, asples bilong ol Cutters long pilai namba 24 raun.

Marum i larim planti pilai long posisen bilong ol, tasol em i putim bek senta pilai, Noel Zeming, husat i no bin pilai long raun 23 na larim Ase Boas malolo.

Gem long Mackay pilai graun bai kamap long Sarere, Ogas 22 we ol bai stat long 6 klok apinun.

CEO bilong Papua Niugini Ragbi Futbol Lig, Shane Morris, i tok tenkyu long olgeta manmeri long ol i sindaun isi

na lukim pilai gut long las wik Sande.

"Tasol i gat sampela liklik senis bai mipela i mekim we toksave bai kam long ol media bipo long narapela asples gem bai kamap bikos mipela i laikim dispela asples gem bai kamap moa smat long las wik pilai," Morris i tok.

Lista bilong ful SP Hunters tim em

- 1 Stargroth Amean,
- 2 Oti Bland Tony
- 3 Noel Zeming
- 4 Thompson Teteh
- 5 Adex Wera
- 6 Israel Eliab
- 7 Atte Bina
- 8 Henry Wan
- 9 Wartovo Puara
- 10 Esau Siune
- 11 Nickson Borana
- 12 Kato Ottio
- 13 Timothy Lomai

Ol pilai husat bai stap long sait long intasenis em

- 14 Lawrence Tu'u
- 15 Roger Laka
- 16 Willie Minoga
- 17 Edward Goma
- 18 Warren Glare
- 19 David Lapua
- 20 Enock Maki

Ol bai rausim tripela pilai long ol husat i stap long intasenis lista.



**NO TRAI:** Adex Wera bilong Hunters i putim trai tasol referi i tok em fowod pas.

## PNG Futbol Asosiesen pilaia i trening

PAPUA Niugini Futbol Asosiesen (PNGFA) i stat kisim ol pilai na trenim ol long ol bai pilai long Osenia Futbol Konfederesen (OFC) long Nesens Kap bai kamap long 2016.

Nesens Kap em i namba tu raun bilong 2018 FIFA Wol Kap kwalifikesen pilai bilong Osenia rijon.

Ol top 6-pela tim bilong dispela pilai bai go insait long namba 3 raun bilong Wol Kap kwalifaia bai kamap long long yia 2017.

Eitpela kantri bai pilai long Nesens Kap we ol bai kama-pim tupela grup olsem A na B.

Ol kantri bai kam aninit long grup A em Tahiti, Nu Kaledonia, Papua Niugini na Samoa, na grup B em Nu Silan, Solomon Ailan, Fiji na Vanuatu.

Asisten Kosa bilong PNG, Milan Meric, i tok, "PNGFA i redi long statim namba wan tim bilong dispela pilai na namba wan hap bilong trening em bai kamap nau (Fonde) long PNGFA Akademi long Lae."

Ol pilai long Pot Mosbi we ol bai trening em John Bai, Roland Bala, Daniel Joe, Michael Foster, David Muta, Jamal Seeto na Patrick Aisa.

Ol pilai long Lae em Ronald Warisan, Ismael Pole, Jeremy Yasasa, Valentine Nelson, Agi Moses, Joshua Talau, Eluda Fugre, Jacob Sabua, Emmanuel Simon, Nigel Dabinyaba, Raymond Gunemba, na Semmy Hkiob.

Ol pilai long Madang husat bai stap long trening em Niel Hans, Darren Steven, Vanya Malagian, Hanson Topio, Papalau Awele na Emmanuel Airem.

Long Wau em Otto Kusunan, Peter Yang na Tommy Semmy, na long Mt Hagen em Koriak Upaiga na Eliuda Pohei long Manus.

# Tumbe na Lahanis i bihainim Isapea na Vipers



**AIYO KAM SAPOTA YA:** Pilaia bilong Bataflai i lukluk long pasim bal tasol nogat sapot i stap klostu long Pot Mosbi ragbi resis bilong ol meri. Planti bilong ol PRL meri i stap long Sauten Son resis long Pot Mosbi. Ol i nemim pinis ol tim bilong Sauten Son bilong ol man na meri.

DIGICEL Kap fainal i stat long tupela wik i go pinis we tupela susa tim long Sauten rijon, Isapea na Vipers, i go aut long resis long namba wan taim.

Long las wik Sande pilai bilong Digicel Kap, tupela narapela susa tim long hailans, Waghi Tumbe na Goroka Lahanis, i bihainim tupela mangi long Sauten, Mosbi na Galp.

Long wankain taim, wangepela mangi Momase tasol i save pilai long Digicel Kap em Snax Tigers, Morobe, husat tu i lus long resis we ol mangi long Rabaul i brukim ol long asples bilong ol long Lae 20-16.

Ol Lion long Simbu i kaikaim

ol Hela Wigmen wantaim 28-10 poin na nau Gurias wantaim ol Lions i kisim ples insait long las sans pilai we tupela bai pilai.

Ol mangi Hagen i kikim ol Lahanis i go aut long resis wantaim 26-17 poin na ol Mendi Muruks i daunim ol Waghi Tumbe wantaim 18-10.

Ol mangi Rabaul i win

tasol kosa bilong ol, Steven Nightingale, i no amamas long repri bikos em i no kontrolim bal stret.

"Ol Tigers long Morobe i gat bikpela skin na moa masol long paitim ol mangi bilong mi tasol ol i pait strong na winim dispela pilai na mi amamas wantaim ol pilai bilong mi," Nightingale i tok.

## Hunters i redi long Cutters

*i kam long bek pes*

Hunters i no bin pilai gut long namba wan hap we planti bal bilong ol i bin lus long han bilong ol na ol Seagulls i bin kisim planti sans. Tasol banis bilong Hunters i moa strong tomas na i no larim ol Seagulls long skoa planti long namba wan hap.

Kosa bilong Hunters, Michael Marum, i givim strong-pela toktok long ol boi em long pilai gut long namba tu hap. Dispela toktok bilong em long ol boi bilong em i karim kaikai, na ol i putim trai olsem nogat man i banisim ol.

Hunters i putim 5-pela trai long namba tu hap long winim dispela game bilong ol, Seagull i nogat sans long skoa long namba tu hap long wanem, banis bilong Hunters tu i go strong tomas long namba tu hap na skoa i stap olsem 36-13 long taim pilai i pinis.

SP PNG Hunters i stap nau long Kem bilong ol long Kokopo na ol bai flai kam bek long Mosbi long Fonde bipo ol go daun long Cairns long avinun na long Fraide ol bai kisim bas na go daun long Townsvills long bungim ol Mackay Cutters long Sarere.

Hunters wantaim Blackhawks i wankain long poin lata, tasol Blackhawks i go pas long wanem, ol i gat poin long foa na agens.

Sapos Hunters i abrusim foa na agens bilong Blackhawks, ol bai gat sans long resis bilong maina primias taim dispela tupela las gem i pinis long dispela mun.

## Sauten Son i mekim fainal seleksen

SAUTEN Konfederesen Son i bin meki fainel seleksen bilong em pinis long olgeta divisisen we ol bai pilai long Nesanel Konfederesen Son sempionsip ol bai pilai long Lae long mun i kam.

Long senia man divisisen, ol man husat i go pas long makim i bin givim nem bilong 36 man na bilong ol meri, ol i makim 26 meri bihain long trail pilai i bin pinis long las wik Fraide.

Nesanel selekta bilong Sauten Konfederesen, Gairo Pepena, i tok, "Em i hat tomas long kamapim ol tim, tasol rot bilong seleksen i

wok gut na nau mipela i mekim fainal seleksen bilong ol tim."

"Olgeta tim menesa bilong wan wan divisisen bai holim wangepela miting long nau (Fonde) long Sports Inn bilong pinisim ol liklik toktok," Pepena i tok.

Ol i pinisim tim lista bilong senia man bilong Sauten Konfederesen Son em Frank Tole, Junior Onguglo, Makara Ura, John Stanley, Roy Elison, Jerry Teme, James Kapi, Mark Piti, Dickson Amea, Joash Toringi, Yala Kevin, Chris Tepe, Stanford Talita, Auki Uru,

Missack Wallen, Ilave Sape, Clerance Tofinga, Udia Ottio, Max Cosmos, Michael Francis, Gordon Bal, Jarrod Haoda, Patrick Morea, Kosman R Rahe, Iso Pondo, Stanley Kobil, Ali Pinda, John Naime, Hobart Paul, Arnold Kapa, John Simon, Junior Dinda, Andrew Daliga, Wai Vali na Jason K Oivi.

Kosa bilong man senia tim em Collin Geno na Moses Matuka em i asisten bilong em, taim Simon Maima bai menesim dispela tim na Toua Kohu bai stap trena.

Long sait bilong meri senia em Taiva Lavai, Vanessa

Palme, Jennifer Roberts, Gare Sam, Mil Jacobs, Fredlyn Yali, Irene Torapa, Betty Kawage, Vero Waula, Brenda Goro, Dela Audama, Naomi Kaupa, Jacklyn Sele, Hele Jared, Epi Moses, Eva Paul, Joan Kuman, Slyder Dorum, Janet Michael, Ruth Kawage, Tina Wek, Maggie Wai, Nancy Digal, Diana Kaupa, Purro Berry na Naomi Kewa.

Sammy Jackson Rice i kosa bilong ol meri senia long Sauten Son Konfederesen na tim menesa bilong ol em Elsie Siki. Bura Bura bai kamap trena long taim bilong pilai.



# PRL trail pilai i pinis

**POT Mosbi Ragbi Lig (PRL) trail pilai bilong ol man na meri i kamap long Kone Taiga pilai graun e mol i pinisim long las wik Fraide.**

Hapbek bilong PRL Yelo, James Kapi, i kamap namba wan pilai long fainal pilai bilong ol man we PRL Yelo i daunim PRL Grin na skoa i sanap olsem 12-4.

Gavana bilong Oro Provins, Gary Juffa, na Siaman bilong Papua Niugini Ragbi Futbol Lig (PNGRFL), Sandis Tsaka, i kamap stap long dispela taim na i amamas long lukim ol namba wan pilai bilong PNG i kamap.

Oi i tok propesi olsem PRL em i primia lig long Nesenel Kapital Distrik (NCD) na PNG

we em bai putim Sauten Kraun long namba 3 yia gen. Fainal pilai bilong ol meri em PRL grin i daunim PRL Yelo we Vanessa Palme i kamap namba wan pilai na i kisim K100 prais mani.

Long anda 18 divisen, Fetmen Tei i pilai gut na Pombie Golden i kamap hiro long anda-16.



**PRL EKSEN:** Tripela pilai bilong Magani i memeim stret pilai bilong Brothers long Pot Mosbi ragbi lig resis bilong ol long Murray Bareks. Pot Mosbi ragbi lig i kamapim wampela trail long makim ol manmeri long stap insait long Sauten son resis.

# Hailans Konfederesen seleksens bai kamap

FAINEL seleksens bilong Hailans Konfederesen bai kamap long Sande long 23 Ogas, we ol bai pilai long Minj pilai graun long Jiwaka Provins.

Oi i bin brukim Hailans Konfederesen i go long tupela son olsem Is na Wes bikos ol i laik painim aut ol namba wan pilai, na mekim seleksens bilong Hailans Konfederesen.

Dispela em bai fainal seleksens bilong Hailans Konfederesen we ol bai go pilai long Nesenel Konfederesen Sempionsip bai kamap long Lae long Septemba 1 i go inap long 4.

Oi nesenel selekta long Lae bai makim ol pilai husat bai pilai moa namba wan na

winim pilai bilong ol narapela pilai bai go insait olgeta long seleksens bilong Papua Niugini Praim Minista 13.

Konfederesen Dairekta, Joe Tokam i tok, "Selekta bilong Isten Son, David Noifa, na Westen Son, Max Tiri, i makim ol pilai pinis we ol bai pilai long Sande long dispela wiken."

"Mi amamas long Noifa na Tiri i yusim ekspirians na save bilong tupela na i makim ol pilai na i redim pilai bai kamap long wiken," Tokam i tok.

"Tiri em i bipo kumul pilai na em i gat moa ekspirians na em i lukluk long ol stail bilong ol pilai na i makim ol we em i givim moa salens long Isten Son."



**MIPELA YA:** Pilai bilong Royals i traim long abrusim pilai bilong Bataflai long PRL resis long Pot Mosbi. Planti pilai bilong Royals i stap insait long Sauten Son resis.

# Jack Pidik Park em i rait hap bilong putim kar

NESENEL Spot Tras Limited (NSPT) i toksave long ol pablik olsem Jack Pidik Park (JPP) em i rait hap bilong putim kar long ol taim gem kamap long Sir John Guise pilai graun long Pot Mosbi.

Long las wik Sande pilai bilong PNG SP Hunters na Wynnum Manly Seagulls, NSPT i tokaut klia long ol nius lain long putim toksave long ol pablik long no ken put kar arere long Sir John Guise pilai graun na ol gutpela spekteta i bihainim gut tok bilong em stret.

Long taim bilong 2015 Pasifik Gems, ol lain i yusim JPP long putim kar na em i bin kamap gut. Na long las wik Sande pilai, ol i yusim dispela hap tu.

NSPT i bin toktok wantaim Nesenel Kapital Distrik Komisnin (NCDC) long yusim ol bikpela fri bas na ol i bin givim sevis long ol pablik lain husat i bin putim kar bilong ol long JPP long taim bilong SP Hunters gem i bin kamap.

Oi i stat long 11.15 moning na i go pinis long 02.30 apinun long kisim ol lain i go long pilai graun.

Taim gem i pinis, ol i kisim ol i kam bek long JPP long 04.00 apinun i go pinis long 05.00 apinon na ol i no sasim mani long lain husat i putim kar bilong ol long JPP.

Oi i bin yusim 5-pela bas bilong NCDC long kisim ol manmeri i go i kam na tu, ol i redim wasman long hap bilong putim kar bilong was i stap.

Oi i bin pasim dispela Wod Strip Rot long Sande, 06.00 moning i go inap long 06.00 apinun.

Long narapela sait bilong kam insait long Sir John Guise pilai graun, wampela sait tasol ol i bin opim long wankain taim bilong ol bus tasol i go insait.

Olgeta tiket ol i bin salim long ol Stop and Shop stua long Pot Mosbi i bin pinis long Fraide yet, na planti lain i no bin go lukim dispela pilai.

# Oi eksekyutiv bilong Penrith Panthers i bin kam long PNG

BIKMAN long ragbi lig long Australia, Phil Gould, em i wampela memba bilong 4-memba Penrith Panthers eksekyutiv husat i bin kam long Pot Mosbi long las wiken.

Siaman bilong Papua Niugini Ragbi Futbol Lig (PNGRFL), Sandis Tsaka, i tok, "Oi i gat bikpela amamas long ol bikman bilong Panthers i bin bihainim toktok bilong ol we ol i bin toktok namel wantaim PNGRFL insait long 12-pela mun, long kam lukim PNGRFL."

"Mipela i lukluk long longpela taim marit wantaim

Penrith Panthers na mipela i tok tenkyu long kam bilong ol na i gat bikpela sans bikos em i namba wan Nesenel Ragbi Lig (NRL) Klap i kam kamap long PNGRFL," Tsaka i tok.

Em i tok moa olsem, "Gould, Sif Eksekyutiv Opisa bilong Panthers, Justin Pascoe, Maketing Menesa, Anthony Frantzis, na Komplit Lig Kosa Ona na Krieta, Graham Windeatt i bin kam long Sarere na long Sande ol i lukim gem bilong ol Hunters na Seagulls."

Long wankain taim, ol i mekim sampela toktok long

marit bilong ol Panthers na PNGRFL program olsem, "Ol pilai bilong Hunters na ol narapela PNG pilai husat i pilai gut long en bai go insait long NRL sistem bihain long ol bai painimaut ol rot bilong trail pilai namel long ol Panthers long NSW Kap na Hunters bai kamap."

"Mipela i bin mekim dispela toktok insait long 12-pela mun na long las wiken, mipela i sainim Memorandum bilong Andastending (MoU) na strongim dispela marit we mipela bai kisim moa strong wantaim ol saveman bilong ol Panthers," Tsaka i tok.

Em i tok, "Dispela marit em i no bilong futbol tasol, nogat. Em i bilong ol narapela ol bikpela samting olsem edministresen sait tu."

Dispela em i wampela bikpela sans we PNGRFL bai skruim marit sistem bilong em long ol narapela NRL klap husat i gat laik long mekim olsem tu.

Gould em i bikpela save pes long PNG bikos em i save wok olsem komenteta long Sanel 9 na em i bipo kosa bilong Nu Saut Wels Orijin sait, tasol nau em i Eksekyutiv Jeneral Menesa bilong Panthers.

## Travel to Kiungu

Visit friends and family. When were you home last?

Linking our country

Reservations - Toll Free: 1805465 Email: [sales.linkpng@airniugini.com.pg](mailto:sales.linkpng@airniugini.com.pg)  
Find us on Facebook: [www.facebook.com/linkpng](http://www.facebook.com/linkpng)

Very Low Air fares

LinkPNG



**YUPELA KAM:** Willie Minoga i train strong bilong em wantaim tupela Wynnum Seagulls.




**YU KAM:** Bikpela fowod bilong bilong Hunters Willie Minoga, i brukim banis bilong Seagulls long Sande pilai bilong long Mosbi. Hunters i win 36-13.




*Ol poto: Nicky Bernard*


**BRUKIM BANIS:** Bikpela fowod bilong bilong Hunters Willie Minoga, i brukim banis bilong Seagulls long Sande pilai bilong long Mosbi. Hunters i win 36-13.



**EM MI YA:** Trai taim bilong Hunters.




**TRAIM ABRUSIM:** Huka bilong Seagulls i train long painim rot long abrusim ol Hunters.



**RONAWA:** Hendry Wan i rona we long banis bilong Seagulls.



**TENKYU YA:** Minoga i tromoi kis long ol sapota long tok tenkyu long sapot taim em putim wanpela trai.



**SEKAN:** Ol Hunters pilaia i sekan long ol Seagulls taim pilai i pinis. Hunters i win 36-13.




**DAI HAT SAPOTA:** Pilaia bilong Hunters i bungim ol sapota bilong em.



**TOP KIKA:** Ase Boas i sekan long ol pilaia bilong Seagull. Boas i kikim olgeta gol na abrusim wanpela tasol.







**IMPROVED TASTE!** Niupela teist wantaim planti mit na oil. Teistim na bai yu laikim moa yet.

## DIANA Tuna



Emi tuna  
bilong PNG

PROUDLY  
PNG  
MADE

Manufactured by



RD Tuna Canners Ltd.

Moa mit na  
oil insait



TUNA IN OIL

# Hunters redi long Cutters

Nicky Bernard i raitim

SP PNG Hunters bai lukluk strong long katim ol Cutters long dispela wiken taim ol i bungim ol long Mackay Stadium long Australia.

Dispela wiken bai seken las pilai bilong namba tu raun bipo long ol i go insait long fainal bilong Kwinslen Kap long Mun Septemba.

SP PNG Hunters i bin kam bek long namba tu hap na winim ol Wynnum Manly Seagulls long las wik Sande pilai long Sir John Guise Stadium long Mosbi. Seagulls i bin go pas long skoa 13-6 long namba wan hap.

...lukim moa long pes 25



TRAI TAIM: Adam Korave bilong Hunters i redi long go daun long trai lain taim em i abrusim ful bek bilong Wynnum Manly Seagulls taim Ase Boas i amamas na ran long sait. Hunters i win 36-13. Poto Nicky Bernard.

## Senisim long Sensi

Next time you change your  
baby, change to Sensi Diapers.

*Good Products, Better Prices, ikam long*

 **Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

